

NODUS GORDIUS NOVUS
NEGOTIORUM STATUS GRAVISSIMO-
RUM, MAXIMEQUE PERPLEXORUM

QUÆ INTER
MAGNATES,

ATQUE
PRINCIPES EUROPÆ
EORUMQUE MINISTROS NOSTRO
TEMPORE GERUNTUR,

POLITICA MODERNA

AD
PRAXIN ACCOMMODANDA,
NOVAQUE METHODO PRACTICA
HEIC ADHIBENDA PRO RATIONE
PRÆSENTIS TEMPORIS,

ET
RERUM QUÆ AGUNTUR
TEMPORE BELLI,

SOLUTUS

ATQUE IN JURE TAM NATURALI, QUAM
GENTIUM, NEC NON REGULIS PRUDEN-
TIÆ, ET HISTORIA ANTIQUA, AC MO-
DERNA FUNDATUS

OPERA
FRANCISCI de GREGORIIS,

TUBINGÆ,
Apud COTTAS FRATRES,
Anno MDCCXXVII.

OFFICE OF THE ATTORNEY GENERAL
STATE OF NEW YORK
ALBANY
JANUARY 10, 1901
TO THE COMMISSIONER OF THE LAND OFFICE
SIR:

ADIRONDACK
RESERVE

RECEIVED
JANUARY 10, 1901
BY THE COMMISSIONER OF THE LAND OFFICE
ALBANY

THE ATTORNEY GENERAL
ALBANY
STATE OF NEW YORK

IN RESPONSE TO YOUR LETTER OF JANUARY 10, 1901
RE: ADIRONDACK RESERVE
Yours very truly,
J. B. CROSSLAND
ATTORNEY GENERAL

V I R O
ILL USTR I S S I M O
EX C E L L E N T I S S I M O Q U E
D O M I N O

J O H. H E N R I C O
L I B E R O B A R O N I

A S C H Ü T Z,
D O M I N O
I N

N e d e l s b e r g, S t u m m e r n,
S i n z e r h a u s e n, &c. &c.

S A C R Æ M A J E S T A T I S R E G I Æ
B O R U S. E Q U I T I.
R E L I Q U A.

serenissimi
WIRTEMBERGIÆ DUCIS
CONSILIARIO
STATUS INTIMO,
ET AD
COMITIA S. R. IMPERII
RATISBONENSIA
PLENIPOTENTIARIO,
UT ET
AD AULAM MAJEST. CÆSARÆ
LEGATO
SPLENDIDISSIMO,
PATRONO
SUBMISSISSIME
ET
OBSEQUIOSISSIME COLENDO
EA, QUAE PAR EST,
ANIMI SUBMISSIONE ET
VENERABUNDA MENTE
OFFERT

FRANCISCUS de GREGORIIS.

*VIR ILLUSTRISIME
EXCELLENTISIMEQUE,
DOMINE GRATIOSISIME!*

Non miraberis, *VIR Illustrissime,*
me Splendidissimo Nomini TUO
inscribere paginas hasce, utpo-
te, quæ non solum cum præ-
sentis temporis conditione atque ne-
cessitatibus convenire aliquo modo vi-
dentur, sed & cum *Persona TUA Illustrissi-*
ma, atque Excellentissima, cuius quippe sub
umbra altoq; Patrocinio in lucem prodi-
re felicitati sibi ducunt. Sicque adeo hoc-
ce opusculum meum perpetuo gloriari
posse confido, pretium atque valorem
se accepisse à *TUA, Vir Illustrissime,* eximia

DEDICATIO

in his præcipue rebus scientia & sapientia, cujus tam egregia atque luculenta specimina tantum eminent & ad eum perfectionis gradum ascenderunt, ut ea ne quidem describere meus ausit calamus, nedum solenni celebrare Panegyrico. Dicat Serenissimus atque Clementissimus Princeps & dominus noster, *EBERHARDUS LUDOVICUS, Regnans Wirtembergia Dux*, qui ex Paterno eoque ardentissimo pro Patria nostra Zelo *TE, Vir Illustrissime*, ad gubernacula reipublicæ posuit, *TUÆ*que incomparabili prudentiæ, sapientiæ atque singulari in rebus agendis dexteritati negotiorum gravissimorum & quam maxime arduorum functiones commisit, in quibus nunquam non ita feliciter omnia cesserunt, ut Principis inde exsplenderit gloria, Patriæ quoque emerferit honor atque desiderata utilitas, bonum publicum subditorum, status denique salus atque ampliatio. Mihi certè impossibile videtur condignam in hac pagina narrationem instituere insignium studiorum, quæ *Illustrissima Excellentia TUA Serenissimo Principi nostro* (quem
Deus

DEDICATIO.

DEUS servet) infimulque universæ Wirtembergiæ magno numero navavit, neque id tantum in Comitibus Imperii Ratisbonensibus publicis, in quibus Heroica quavis constantia fervidoque pro Religione Zelo causam Evangelicam nunquam non egisti, defendisti atque protexisti, sed & apud Aulam Cæsaream Viennæ, ubi nodos difficilimos & maxime intricatos plurimarum rerum, sive illæ spiritualia, sive temporalia attingant, feliciter prorsus omni- que cum applausu solvisti, ita quidem, ut Ipsa hæc *Augustissima Aula Cæsarea*, tantarum quippe virtutum Spectatrix atque Admiratrix confessura sit, immortalitate digna esse *TUA* merita. Quin & per universum Imperium satis jam sparsa est admirabilis sapientiæ *TUÆ* fama, neque ullus in eo status datur, qui eam non miretur, æstinet, celebret. Denique ipsa frons *TUA* sublimis atque Nobilissima distinctas, & quas omnes legere possint, lineas exhibet constantis fidei, æquitatis erga omnes, & integritatis nunquam corruptæ. Quæ omnes atque singulæ

)(4

dotes

DEDICATIO.

dotes in gradu æque perfecto proprium quoddam & quasi domesticum ornamentum sunt universæ *Illustrissima Familia TUÆ*, in cujus confirmationem luculentissima specimina exhibet pretiosissimus atque Nobilissimus ramus & *Filius TUUS Excellentissimus atque Illustrissimus Dominus, Liber Baro A. H. à SCHUTZ, Vice-Præses in Consilio Regiminis Dignissimus*, qui rara sua sapientia, in gerendis negotiis publicis promptitudine atque indefessa sollicitudine, æquitate etiam animique integritate in hac jam ætate sua virtutum harum Heroicarum tantum possidet, quantum apud complures alios in consummata ætate constitutos vix deprehenderimus, quive adeo in tanto perfectionis fastigio constitutus universo mundo Wirtembergico vivam effigiem eruditionis, atque virtutum *tanti Patris in Nobilissima sua Persona* exhibet. Quemadmodum igitur Doctissimus iste gentilis, cum laudes Alexandri decantare vellet, sublimiore Panegyrico alio non utebatur, quam ut solum hoc repeteret, *esse eum filium Philippi*, ita & mihi sufficiat

DEDICATIO.

ciat dixisse, *esse EUM Filium tanti Patris, qualis TU es; Vir Illustrissime*, cuius summa atque immortalia merita se-
ra posteritas in gratissima servabit me-
moria, ipsa autem æternitas fastis suis
inscribet. Atque ita igitur haud feli-
ciorem sanè sortem tractatui meo Po-
litico vel exoptare vel procurare ego
poteram; quam ut *Illustrissima Excellen-
tia TUÆ*, Literarum quippe & Musarum
Fautoris, Protectoris atque Patris
benignissimi altum implorarem Patro-
cinium. Patere igitur, *Vir Illustrissime*,
ut ad tantum, in quo Divina providen-
tia Te collacavit, fastigium pronus ac-
cedam, rarissimas *TUAS* virtutes ubi-
que terrarum decantatas, nec non in-
signia merita, nunquam satis laudata
venerabundus exosculer, *TIBIQUE* præ-
sentes paginas, cumque illis æternum
meum obsequium ea, qua par est, ani-
mi devotione offeram, ea spe fretus,
TE non solum hoc, quicquid est, ea,
qua soles, magnanimitate atque ge-
nerositate suscepturum, sed & deside-
ratissima hac & nunquam satis expe-
tita gratia me complexurum, ut Ser-

DEDICATIO.

vorum Tuorum saltem minimus dici,
atque sub Tuo Patrocinio lætus vivere
& tutus quiescere possim. Cæterum
supremum Numen ardentissimis votis
implorare nunquam desistam, ut *TIBI*
fausta & fortunata porro esse omnia
jubeat, vitam longævam, annos flo-
rentes, perpetuum *Illustrissima Familia*
splendorem, & quicquid votis com-
plecti unquam potes, quam cumula-
tissime largiatur.

ILLUSTRISSIMI NOMINIS TUI,
DOMINE GRATIOSISSIME!

TUBINGÆ

Anno MDCCXXVII.

HUMILLIMUS SERVULUS
ET CLIENS

FRANCISCUS de GREGORIIS.



BENEVOLE LECTOR.

Qui oculos Tuos in hocce meum Opusculum conjicis, Amice Lector, sub primum statim ejus obtutum rogaris, ne id contemnas. Juvabit, antequam judicium de eo tuleris, si tantum à Te impetrare possim, ut attente illud perlegas, ita namque demum, quod scio, fateberis, nunquam Te legisse argumentum tale Politicum, eo quo ego feci, modo pertractatum. Effluxerunt jam sedecim anni, cùm sub **CELSISSIMO** atque **BENIGNISSIMO** Patrocinio **CLEMENTISSIMI** atque **SERENISSIMI PRINCIPIS** mei, Regnantis Wirtembergiæ Ducis, in almam hanc Universitatem Tubingensem vocari mea-
que

PRÆFATIO.

que huic ipsi servitia addicere honori mihi fuit. Quamprimum adveneram, placuit Excellentissimis ejusdem Dn. Professoribus, ut non solum ad audiendam Thesium suarum demonstrationem, sed & ad disputandum atque opponendum publicè non una ductaxat vice me invitarent, id quod Divina favente gratia ita mihi successit, ut ex ipsorum testimonio, universis Auditoribus satisfecisse me sperem. Quo impulsus Reverendissimus D. D. Jægerus B. M. me rogabat, ut breve omnium controversiarum compendium cum Catechismo Evangelico Italico. Sermone in lucem ederem, idque lucis gratia atque in beneficium spirituale peregrinis istis Italis, qui servitiis SERENISSIMI atque AUGUSTI PRINCIPIS mei addicti in his terris commorantur, vel & illis qui inspiratione quadam Divina moti ad amplexandam Religionis Evangelicæ lucem terras hasce petunt. Mandatum hujusce tam pii tamque docti Cancellarii Jægeri ego tanquam filius ejusdem spiri-

PRÆFATIO.

spiritualis omni cum submissione atque cura fui executus. Atque ita illud, de quo dixi compendium atque catechismum omni Zelo, atque reverentia utrique parti debita auxiliante DEO composui atque perfeci, nullis prorsus injuriis aut convitiis in partem contrariam jactis, sed sola convincente scripturæ S. autoritate usus, modo pariter miti, planè uti & Lex J E S U CHRISTI nobis præscripta mitis atque suavis est. Non sine applausu receptum fuit primum hoc opus meum, id insuper honoris expertum, ut à primariis quibuscunque Patriæ Theologis ipso quoque Ducali Consistorio unanimi voce confirmaretur atque in bonum publicum promoveretur. Præter hoc verò à peregrinis quoque eo cum æstimo exceptum fuit idem, ut Gallus nonnemo Regiæ Majestati Borussiae ab officiis Ecclesiasticis illud Berolini ipse in Gallicum Sermonem boni publici causa verteret. E contrario verò cum ex his terris à servido quodam Pontificio Romam deportare-

PRÆFATIO.

taretur isthic libellus meus, sortem expertus fuit planè contrariam, condemnatum namque atque in foro publico Minervæ, ubi congregatio Inquisitionis ter per septimanam omni rigore instituitur, combustum fuisse, per litteras relatum accepi. Sed patienter isthæc quidem ferenda sunt: est enim hæc misera quædam sors libris omnibus communis, quotquot prohibiti ab Aula Romana vocantur. Secundum opus meum Historia Romana fuit Joh. Baptistæ Comazzi à Julio Cæsare usque ad Constantinum Chlorum è vernaculo sermone in Germanum traducta, sententiisque suis moralibus pulcerrimis exornata, cui titulum dedi: *PRUDENTIA POLITICA IMPERATORUM ROMANORUM*. Quod ipsum opus Lectoribus rerum intelligentibus non minus eum in modum placuit, ut à Bibliopolis peregrinis, Belgis quippe, Gallis atque Germanis iterum iterumque prælo fuerit subiectum. Excepit hoc Ars Historica Augustini Mascardi quinque libris constans, (vide Leonem Allatium de

PRÆFATIO.

de Viris Illustribus. pag. 67.) & ex mandato Doctissimi Historiarum Professoris Neuii B. M. nec non aliorum qui in universitatibus Saxonis clarent, Professorum ex Italo Sermone in Latinum à me versa, judicantibus omnibus atque singulis, necessariam esse bono publico talem operam, ad intelligendas Historias tam antiquas quam modernas easque invicem combinandas: Et verò multo labore opus istud mihi constitit, integrumque biennium & quod excedet, à me postulavit. Atque itaque qui in prioribus opusculis meis singulis applausus qualiscunque gloriam vindicare mihi possum, indubitatam exinde spem concipio quartum hoc, quod jam sisto atque ad quinquagesimum quartum ætatis meæ annum progressus luci expono, eadem forte fruiturum esse. Solvet id facilius Nodum Gordium rerum Politicarum, inter Principes atque Magnates hodie tam frequentium, Lectoribus etiam aut quicunque eo uti voluerit, uti spero satisfaciet atque lucem affundet.

Ani-

PRÆFATIO.

Animus mihi est, usum eorum docere atque exponere, quæ alii Autores modo solum speculativo scripserunt atque pertractarunt: quod si in usum deducantur hæc libelli mei capita, opportuno satis tempore in lucem iste prodigiis dici poterit. Id saltem in votis habeo, ut labor hic inferviat ad irrigandos honestos Principum & Magnatum animos, iique eam utilitatem quam ingenerium meum atque intellectus perquam debilis ipsis proposuit, inde recipiant. Rogaris denique, amice Lector, ne Te moveant, si quæ sunt vitia impressionis, quippe quasi inevitabilia, sed ad ipsam rem potius animum adver-

tas. Ita Vale.

PRÆ-

*PRÆCOGNITA
ET SUPPOSITA*
AD SEQUENS
PRIMUM CAPUT
DE
NEUTRALITATE
ET
DECLARATIONE.

Non est hic mihi animus de Neutralitate in Theoria longum sermonem instituere, sed loquor de Neutralitate, aut declaratione, in quantum eæ exerceri possunt, ut, quando vel tandem alterutram harum de facto amplecti liceat, constet. Theoretice de iis disputare sine dubio multo facilius mihi futurum esset, quam secundum praxin & usum loqui, quandoquidem multi Autores tam Neutralitatem, quàm Declarationem, optime definiverunt, licet pauci determinaverint, possem dicere nullus, quando consultius sit, uni atque alteri parti se addicere. Theoretica de Neutralitate vel Declaratione Tractatio cujuslibet Autoris, Publicistæ quam maxime, opus est; ut verò iis rectè uti quis

A

possit,

possit, hoc quidem à particulari conditione Principum eorumque statuum proxime dependet. Volo nihilominus supponere, quod tam Theoretici, quam Practici, qui de ipso usu atque exercitio loquuntur, conveniant inter se, *quod dentur quidam nec fœderati nec hostes, qui in Romanis Historiis medii vocantur, moribus nostris neutrales*, uti loquitur Illustr. Jct. Joh. Georg. Kulpisius in Collegio suo Grotiano; & pariter, *quod Neutralitas sit Jus aequalis amicitia erga eos, qui invicem hostes sunt*. Hæc autem æqualitas amicitia Principis cujusdam vel Reipublicæ, quæ Neutrale esse studet erga eos, qui bello se invicem lacerant, tam rigide servari atque sustentari debet, ut uni non magis vel minus adhæreat, quam alteri, statim enim, ubi hoc fit, Neutralitatem non servari, pars altera queritur: plane indifferens ad unam sicut ad alteram partem esse debet, qui Neutralitatem servare in se suscipit, quod si enim aliter quis facit, pars offensa habet unde conqueratur seque ulciscatur. Lucius Æmilius, Prætor Romanus, ita Tecios arguit apud Livium Lib. 37. *quod Comœatu classem hostium juvissent vinumque promississent Polixenida classis Antiochi Præfecto, quæ si eadem classi Romana darent, revocaturum se à populatione militum, sin minus, pro hostibus eos se habiturum*. Suppositis his omnibus præmitto etiam cum Sapien-

Sapientissimo Joh. Henr. Boeclero Dissert. Acad. XXXIV. titulo: *Quies in Turbis*, quod Principes, qui à particularibus pactis & contractibus exempti sunt, ex Jure Naturæ & Gentium vel Neutralitatis vel declarationis partes possint amplecti, prout propriæ utilitatis ratio id exigat. Et quamvis casus dari possit (id quod sanè inter Principes humaniores, uti postea in sequenti primo capitemonebo, fieri nunquam deberet) ut Princeps aliquis vi armorum ab una parte potentiore compulsus se videat, ad partes ejus amplectendas, non tamen sequitur, jure hoc fieri ac justitia. En! breve compendium eorum, quæ Doctissimus Boeclerus in forma thesæos hunc in finem pronunciat. *An illi, qui tam bonis ac necessariis consiliis ducti societatem bellicam declinant, jure cogi possunt, ut partibus accedant? Non audivimus modo, sed vidimus iracunde denegatam juste petentibus quietem. Quasi hic esset vulgo sensus bellantium, si vires cogendi in partes adsint, de jure non dubitandum esse. Quem morem sapientia melior ultro refutat. Demtis enim pactiōis & fidei vinculis armorum societatem exigentibus, jure natura & gentium liberum esse cuique debet, armis aliorum abstinere & inter dissidia externorum quiescere. Fœdera etiam bellica sua natura libertatis sunt & consilii, non necessitatis & præcepti. Et*

A 2

quam

quam iniqua ratio est: Noluisti socius esse, ergo hostem me senties, etiamsi hostem meum non adjuveris, etiamsi ab omni studio partium Te continere volueris. Concludo igitur ex hac doctrina, Principem, qui non se ipse obligavit (nisi evidens periculum ruinam totius Imperii, Regni Patriæque minitans immineat) quando videt, quod auxilia publica, quæ ab occasione & in expeditione sperantur, lenta esse possint, incerta etiam neque sufficientia aut valida satis ad sustentandum & conservandum statum suum vimque hostium ipso potentiorum vi repellendam, si ipse non pacta & contractus particulares in contrarium fecerit, nec bellum contra Universum Imperium sit, talem, inquam, Principem de Jure Naturæ & Gentium Neutralitatis partes amplecti posse atque, si æqualem amicitiam adversus partes belligerantes servet, non, nisi contra jus naturæ & gentium, cogi posse ad arripiendas partes declarationis, Neutralitatis autem negligendas. De qua loqui jam instituimus, secundum exercitium scilicet & quando in praxi illa uti liceat.

DE Neutralitate tractationem instituere, inter omnes materias politicas, & quæ Principibus tam belli quam pacis tempore possunt occurrere, è difficillimis una est. Quandoquidem neutri parti addictum esse id-

idque vel inter multos, vel inter paucos, vel & inter duos saltem Principes, qui bella mutua gerunt, atque è contrario pariter unius ex illis amicum atque socium se declarare, res est, quæ tam immediatè à conditione particulari Principum eorumque statuum dependet, ut difficile omnino sit, discursum generalem super hoc argumento instituire. Quapropter non ego solum, sed & quivis alius, qui antiquos Politicos legerit, certo mecum affirmabit, nihil unquam se in horum operibus de consimili materia generaliter dictum deprehendisse, quod operæ esset pretium. Nihilominus, cùm hoc argumentum de neutralitate vel & declaratione belli tempore tantum pondus secum vehat, ut ut difficilis sit ejus explicatio, id mihi dedi negotii, ut pro virium mearum tenuitate illud pertractarem, atque non tantum rationibus quibusdam naturalibus, sed & Autoritate, quantam quidem Historiæ antiquæ atque modernæ attentius à me perlectæ suppeditarunt, suffultus meliorem idque sequentem in modum deciderem.

Ita comparata est, teste Polybio, natura Principum, ut pro amico vel inimico absolute habeant neminem, sed ipsorum tam amicitias quam inimicitias ad utilitatis, quæ exinde sperari potest, leges exigant. Et Plutarchus dicit, *Reges atque Principes nomine Belli atque pacis uti, sicut monetis, pro di-*

verso scilicet valore. Uti scilicet cibi quidam, quorum natura insipida est, à condimentis, quæ coquus illis adspersit, saporem accipiunt: ita & Principes, cum per se ipsos Principes sint, nulla tantisper peculiari animi inclinatione abrepti, postea tamen belli tempore in hanc vel illam partem propendent, prout lucrum animo atque affectui ipsorum imperat, aut, ut melius dicam, utilitas, quæ gustus & sapor ipsis est, quam maxime promovetur. Et exinde quidem est, quod iidem Principes, uti experientia testatur, nostris quam maxime temporibus, gustum & saporem utilitatis ipsorum omni lique proximo cognationis gradui anteponunt, quia ratio status ita requirit, quæ verò nihil aliud est, quam ratio utilitatis. Quilibet affirmare hoc poterit, inductus Exemplis modernis iisque bene multis Imperantium quorundam, qui, licet arctissima cognatione inter se invicem conjuncti, hac tamen non obstante cum aliis, quibuscum non tam arcta ipsis intercedit connexio, sese colligarunt, ut jam quidem patet Exemplo Hispaniæ, quæ cum Imperatore se conjunxit exclusa Gallia, & vice versa Galliæ, quæ Angliæ partes cepit, exclusa Hispania, nec non defuncti Electoris Bavarici, qui licet necessitudine attigerit Imperatorem Romanum, Hannoveranas tamen partes amplexus fuit. Parimodo alterum habuimus Exemplum

plum ultimo hoc bello & quidem in Gallia, quæ Imperatori atque Angliæ contra Hispanos se adjunxit tam mari quam terra, ita, ut destructa atque pessundata navali Hispanorum classe à fœderata Anglorum in maribus Italicis, frenatoque & depresso terra, idque in propriis ipsorum finibus Hispanorum fastu à Cardinale Alberonio inspirato, per fortitudinem Gallorum Imperator jam regno Siciliae potitus & in tranquillam totius Italiae possessionem restitutus fuerit. De antiquis populis & quam maxime de Lacedæmoniis, qui inter omnes Græcos in bono & florenti statu suo quam diutissime se tenuerunt, scribit Thucydides, *quod præ omnibus aliis commodum suum absque ullo cognationis aut alterius cujusvis rei respectu secuti fuerint, atque sine omni dissimulatione id pro justo habuerint, quod emolumento atque commodo ipsorum aliquo modo satisfacere aptum fuerat*, quem in modum Agesilaus Clarissimus Lacedæmoniorum Rex dicere solitus erat, *se omne id pro justo habere, quod Patriæ utilitatem aliquam afferre possit*. Ut proinde nihil magis proprium sit Principi, quam indifferentia & neutralitas inter duos Principes vicinos bellum secum invicem gerentes. Quid quod neutralitas quasi naturalis sit Principibus, declaratio autem tantum accidentalis. Cæterum tamen, ut videamus, quan-

do Princeps hanc naturam suam sequi, vel ab ea recedere debeat, commoda neutralitatis ex una, uti & incommoda ex altera parte, & sic pariter, quid declaratio *bonorum* vel *malorum* habeat, seorsim considerabimus. Primò, qui neutralis est, ab ambabus partibus colitur atque honoratur ex timore, quem utraque habet, ne contrariæ accedat. Qui neutralis est, litis alienæ quasi arbiter, sui autem Ipsius dominus manet, fruitur præsentī & servit tempori: qui autem tempus habet (quod optimorum consiliorum promus condus est) habet, uti dicere solent, vitam, & tali quidem arte multos status dominium suum stabilivisse atque ampliassē, in Historiis tam antiquis quam modernis legimus. Porro qui Neutralis est, absque inimico aperto vivit neminemque manifestè offendit, & verò (uti Polybius inquit) *nihil est, quod in omnibus rebus plus valeat, quam moderatio, & si nemini, quicumque tandem ille sit, durius quid facias.* Mala hæc sunt: Qui neutralis est, uni atque alteri parti male admodum satisfacit, & ambas clanculum sibi inimicas facit, uti Polybius ait: *Neque amicos parat, neque inimicos tollit*, & (sicut Aristenus Prætor de Achæis dicit) *quid aliud quam nusquam gratia stabili, veluti qui eventum expectaverimus, ut fortuna applicaremus nostra Consilia, præda Victoris erimus?*

mus? non, quemadmodum hodie vobis utrumque licet, sic semper liciturum est, nec semper nec diu eadem occasio fuerit. Hoc est: Quid aliud erimus nos, quam præda Victoris, ceu qui sine gratia stabili, ut fortunæ nos accommodaremus, eventum rerum expectavimus? Non semper erit, ut hodie in vestra manu est, ut amplecti possitis unam atque alteram partem. Quia, inquit C. Q. Flaminius, id, quod aliqui optimum esse dicunt, ne huic bello vos immisceatis, non nisi summum vobis creare potest præjudicium. Cui accedit, quod amissa omni gratia atque dignitate victoris præda eritis aut præmium. Id quod cives Rhodii, nec non Eumenes Rex Asiæ neutralitate sua in bello inter Romanos & Regem Perseum exemplo suo comprobarunt, quandoquidem hic male atque contumeliose fuit habitus, isti autem parte ditionis suæ à Romanis privati, ne quid dicam de timore, quem & hic & isti conceperant de exitio suo omnimodo. Denique, *inter impotentes & validos* (uti Tacitus inquit) *falso quiescas, ubi manu agitur, modestia & probitas nomina superioris sunt.*

Videamus nunc, quid *boni* habeat *Declaratio*. Primò melius est permittere se fortunæ cum uno solo amico, quam odio duorum se exponere, secundo: Præstat cadere conjunctum cum socio, quam solum;

Satius est, tentare Victoriâ factâ declaratione, quam hac omiſſa oppreſſionem deinde à victore, quicumque ille fuerit, certò exſpectare.

Mala verò hæc ſunt. Primò, qui ſe pro parte aliqua declarat, apertum ſibi facit inimicum. Secundo, ſicut res amara naturaliter magis nobis diſplicet & ſtadium parit, quam dulcis nos juvat atque delectat, ita injuriæ & offenſæ vehementius nos movent, quam officia & favores. Unde ille, contra quem Tu te declaras, ſemper promptior erit ad Te offendendum & vexandum (uti experientia nos docet) quam alter, cui Te adjungis & pro cujus partibus Te declaras, ad Te defendendum Tibique ſuccurrendum in tuis neceſſitatibus. Id quod ſuo quidem damno atque perniciæ comprobavit Sultanus Egypti, qui, cùm ex favore erga Iſmaëlem Perſiæ Regem contra Selimum Turcarum Imperatorem ſe declaraffet, hunc quidem poſteriore ad eo adverſus ſe concitavit atque irritavit, ut vitam cum Imperio perdiderit, cùm interim Iſmaël ad ſuccurrendum illi vel ſucceſſori ſuo ne vel tantillum ſe moveret. Redigamus jam hoc argumentum in tres regulas, quarum prima ſit: *Potens Princeps in hoc caſu non multum opus habet conſilio*, quando quidem ipſa potentia ab inſultibus quorumlibet, qui ipſum deprimere aut ſubjugare geſtiunt, eum reddit ſecurum: quod

quod si cum aliis se colligaverit, satis virium secum affert, quarum ope facilius ipsi erit victoria, ejusque fructuum usus dulcior: quod si autem neutri parti addictus fuerit, hoc ipso sinistra belli accidentia & sumtus fugiet, & dum vicini sese mutuo consumunt, ipse interim redditus suos quietè accipit & pecunia non minus crescit quam potentia.

Altera regula hæc est: *Pro Principe, cujus potentia debilior est, neutra pars est tuta.* Non neutralitas, quia defuncti ipsi vires ad se sustinendum atque conservandum, ita, ut semper præda esse possit bellantium atque ludibrium victoris. Nullius autem unquam durior est conditio, quam talis, cujus terra præter naturalem suam infirmitatem media est inter duos Principes ipso potentiores & secum invicem belligerantes. Quid verò Principem debilem, & cujus præterea solum angustum nimis est, magis juvat, neutralitasne an verò declaratio? Hoc opus hic labor! quandoquidem nulla res est, in qua difficilius sit consilium, ut & mihi ipse persuadeam, plus hic valere fortunam, quam rationem. Egrege quidem intellexit hoc punctum Siphax Numidarum Rex, qui, cum bellum inter Romanos & Carthaginienses exortum videret, seque huic incendio vicinum esse animadverteret, Romanis persuadere omni nisu conabatur, ut extra Africam bellum gererent

rerent ne scilicet ipsi incumberet necessitas cum alterutra parte se uniendi. Et Livius scribit, *erupto Romanos inter & Regem Perseum bello, cum Principes Civitatum liberarum pro una aut altera parte se declararent, sapientiores voluisse ut, antea quam una ex istis duabus oppressa atque pessundata fuerit, pacem inter se invicem componerent: cum tali modo una aut altera pars eos semper defensura & in pace conservatura sit.* Nihilominus ego, generaliter loquendo, consultius judicarem, ut Princeps debilis neutralitatem servet, quam ut pro altera parte se declaret: dummodo vicini, qui inter se contendunt, non sint Principes planè inhumani, & barbari bonæque famæ & honori inimici. Hoc nobis suadet Doctissimus Dominus Boeclerus differt. XXXIV. dicens: *Si enim nullum possumus momentum facere vel ad nos tuendos, vel ad alios juvandos, sed expositi sumus cujusvis occupantis viribus, rectius aliquis dixerit & consultius esse, expectare quam irritare fortunam.* Sed particularius hocce consilium confirmat Per-Illustris Dom. de Kulpis cap. XXVI. pag. 102. n. 9. de jure neutralitatis dicens: *Ponamus, proximam Principem vel Rempublicam particularem suis viribus resistendo imparem citius ab hoste subactum iri, quam publicè succurri queat, an non præstabit neutralitate sibi invicem*
pro-

prospicere & se in alios casus communi Reip. vel fœderatis conservare, quam armis ad deditionem compelli & fieri hostilis potentia accessionem? Cujus ratio hæc est, quod, quamvis Neutralitas utrique parti minus placeat, neutram tamen ipsa re offendit, & damno afficit. Unde non alia sensus aut vindictæ causa inde enasci potest, quam quod invitus spectatorem egeris. Quod si verò Te declaras, injuriam facis, Teque necessario cum armis in manu alteri parti inimicum detegis, quo in casu *manet alta mente repositum judicium Paridis spreteque injuria forma.* Qui verò neutralis est, neutram partem contemnit, quin utramque potius timet, nullumque illi exhibet servitium, sed nec injuriam facit. Cui accedit, quod cùm exitus declarationis dubius sit, quandoquidem nulla res magis incerta est, quàm eventus bellorum, (*nusquam minus, dicit Hannibal, quàm in bello, eventus rerum respondent*) nulla adsit ratio, cur Princeps, de quo jam sermo nobis est, plus fiduciæ ponere debeat in declaratione quam neutralitate, quandoquidem novas partes amplecti nemo debet, quæ meliores non sunt antiquis; uti videmus, quod natura non sinat perire florem, nisi propter fructum, neque admittat corruptionem, nisi propter generationem. Favent huic opinioni Exempla: nam Philippus
Rex

Rex Macedoniae bonam ditionis suae partem perdidit, quod in favorem Carthaginiensium pro Romanis se declarasset, & Siphax ob eandem causam cum libertate Regni jacturam fecit. Ita & Epirotici & Gentius Rex Illyriorum, quod Regi Macedonum contra Romanos favissent, ruinam sibi ipsis omnes pararunt; &, ut taceam facta adeo antiqua, Campson Gaurus, quod aperte nimis staret à partibus Ismaëlis Persarum Regis contra Selimum Turcarum Imperatorem, vitam atque statum perdidit. Nostris verò temporibus Duces Lotharingiae in bellis, quae Imperio cum Gallia intercesserunt, beneficio neutralitatis ab omni periculo tutos magno cum honore se reddiderunt, cum è contrario Dux Bavarorum ultimo defunctus ob nimium erga Gallos studium è sua ipsiusmet ditione atque terra ejectus fuit, cujus calamitatis damnum, licet postmodum magno cum labore nec sine difficultate regno suo redditus fuerit, tamen ne sic quidem restitutum adhucdum hodie persentiscit. Pariter in bello Italico Imperatorem inter & Galliam ultimus Mantuae Dux Carolus Gonzaga, postquam Gallis favere incepisset, terris suis ejectus atque privatus fuit, atque adeo restitui non potuit, ut potius extra suam Patriam mori necessum habuerit, Cognatus licet Imperatoris. Scilicet, ut supra innui, ratio status, quae nihil aliud, quam
uti-

utilitatis est ratio, omnes reliquos gradus post se relinquit. Arrigum quoque Navarræ Regem, quod partes Ludovici Galliæ Regis contra Papam Julium amplexus esset, optimam regni sui partem amisisse, in historia temporum relatum legimus. Carolus quoque Sabaudia Dux potissimo terræ suæ districtu expulsus fuit, quod in partes Caroli V. Imperatoris contra Franciscum I. Galliæ Regem nimis propenderet, quin & paratum jam erat Guilielmo Clevensium Duci exitium, quamprimum se cum Francisco Rege contra Carolum V. Imperatorem conjunxerat. Denique pro uno exemplo, quod afferri forsan posset de aliquo, cui noxia fuit neutralitas, triginta alia eorum in promptu sunt, quibus damno fuit declaratio. Dixi, hoc valere inter Principes, qui nondum omnem exuerunt humanitatem; neque enim, uti supra pariter dictum fuit, loqui mihi animus est de inhumanis & barbaris, quibus quippe fidendum omnino nunquam est; cum enim hi in expeditionibus suis bellicis nullum alium habeant finem, nisi splendorem atque potentiam, omnes illos absque ullo respectu oppriment, quibus se superiores esse cognoscent; atque adeo non neutrales tantum, sed & ipsos partium suarum fautores atque defensores, quum scilicet fortunæ semel se permiserint. Quod si verò alteri Principum, qui bellum invicem

ge-

gerunt, addicere se oportet, cuinam ergo potissimum? illi sine dubio, qui est potentior, si quidem utilitatis aliqua haberi velit ratio. Potentia autem duplex est, *absoluta* & *conditionata*. *Absolute* potentior ille est, qui conditionem habet ampliorem, selectiorem exercitum, hominibus, militibus, commeatu, oris atque belli munitione omnique apparatu militari tam mari quam terra instructum: qui ditior est ære numerato, & pecuniam ex subditis suis conficiendi artem maxime callet. Nervus enim belli est pecunia; hac demum præsentē sua armis accrescit utilitas: absque nummorum copia bellum longius extendere impossibile est, & Princeps non tam ex censibus redditibusque ordinariis divitias atque opes suas metiri debet, quàm ex modo & arte pecuniam comparandi per vias ordinarias absque gravi tamen subditorum suorum onere. Ideo Joannes Jacobus Triultius, in bellicis expeditionibus expertissimus, dicere solebat, *quod tria requirantur ad bellum. Primò pecunia, secundò pecunia, & tertio pecunia*: & quidam alter sapiens vir respondit: *ergo ad bellum requiritur sine fine pecunia*. Major sed conditionata potentia ea est, quæ, etsi absoluta minor sit, magis tamen apta est ad offendendum aut juvandum Te. Ubi sanè vicinia multum interest, quandoquidem vicinus Princeps, viribus licet mediocris

cris facilius & citius uti nocere, ita & juvare atque succurrere potest, quam maximus Princeps, sed qui procul abest: quis enim dubitat, quin Ludovicus XII. Gallia Rex validior fuerit Ferdinando Arragonia, & Carolus V. Francisco I. Nihilominus Arragus Navarra Rex Ludovici studiosus, & Carolus Sabaudia Imperatoris sequax, paucos intra dies oppressi fuerunt, iste quidem à Ferdinando & hic à Francisco, non alia ex ratione, quam quod Navarra viribus Arragonia & Sabaudia Gallia propter viciniam nimis essent exposita.

Probe hoc intellexit Geron prudentissimus Siracusæ Rex, hic enim in bello inter Romanos & Carthagenenses propter Sicilia res accenso ab initio quidem Carthagenensium, quippe qui alicujus partis Insulae regno suo vicina Domini erant, castra secutus erat, postea autem quam Romani potentia atque sociorum copia crescerent, eosque adeo ob viciniam Italiae tam ad favendum quam nocendum sibi aptiores esse intelligeret, relictis Carthagenensium partibus cum ipsis Romanis se conjungebat.

Tantis sanè difficultatibus atque fatibus subjecta est longinquitas, ut illis, qui auxilium atque opem expectant à Principibus, quos montes, maria aut notabile locorum intervallum à terris ipsorum disjungit, id ordinarie accadat, quod Saguntinis, quos

Hannibal citius oppressit, quam Romani juverunt, & illi tamen ultra septem menses pertinaciter se defenderunt. Etenim ob insignem terrarum à se invicem distantiam, ubi supplementa militibus mittenda sunt, multos viæ difficultas atque itineris injuria abripit, quin & ex censibus crassissimis, quos secum vehunt permutationes & pacta, quæ cum mercatoribus intercedunt, plus, quam credi potest, nummorum in ipso itinere consumitur. Quod si miles, qui in istiusmodi regiones mittitur, hyemis tempore profectionem instituat, tum vel ex frigore, vel aliis viæ molestiis morietur, saltem male admodum dispositus & ad toleranda belli incommoda parum aptus adveniet: pone autem, mature satis mitti copias auxiliares, sub finem æstatis aderunt, & eo demum tempore, quod hybernis repetendis opportunius est. Cum denique in expeditionibus bellicis nihil majoris sit momenti occasione, patet, opinor, ista neminem recti uti posse, qui è longinquo bellum gerit. Occasio enim fugit in puncto, longinquitas autem tarditatem necessario parit. *Si in occasionis momento* (dicit Livius Martius) *cujus prætervolat opportunitas, cunctatus paulum fueris, nequicquam mox omissam queraris.*

Quandoquidem verò bellum potius animi quam corporis viribus non geritur tantum sed & alitur, hinc opus est, ut in ejus
decla-

declaratione tam natura quam consuetudo Principum probe considerentur, & majus constantiæ quam audaciæ, patientiæ quam temeritati momentum statuatur. Plus animi habebant Athenienses quam Lacedæmonii, quia verò hi prudentiores erant atque cautiores, quin & patientiores, inde tandem erat, ut superiores istis evaderent; pari ratione Romani primum & secundum bellum Punicum animi magis quam virium magnitudine ad exoptatum finem perduxerunt. *Nobis fors est (dicit Scipio) ut magnis omnibus bellis victi vicerimus. Omitto Persenam, Gallos, Samnites, quot classes, quot Duces, quot exercitus priore bello amissi sunt?* Ita pariter & Hispani, uti in Historiis legimus, in bello, quod majore cum patientia & tolerantia omnis ejus, quicquid corpus humanum perferre potest, quam armorum impetu susceperant, maximam partem vicerunt, impetus enim, uti flamma à sarmentis concepta, aut cursus atque torrens aquarum verno tempore, non diu durat. Unde patientia & tolerantia victrices facile decedunt.

CAP. II.

DE

FÆDERIRUS

INTER

PRINCIPES TEMPORE
BELLI.

Potentia & vires aliorum crescunt per viam *fæderum*, quippe quæ Principes & fortiores & animosiores reddere solent: multas enim res neque potest neque audet suscipere solus aliquis, quas tamen & posset & suscepturus esset cum aliis sociatus; cui accedit, quod societas auget gaudium de rebus prosperis & minuit damnum de adversis. Jam verò variæ dantur *Fæderum* species: Sunt enim *perpetua & ad Tempus: Offensiva vel Defensiva: Offensiva & Defensiva simul*. In quibusdam *Fæderibus* Confoederati paris inter se sunt conditionis, uti pro præsentī tempore Helvetii inter se sunt nec non unitæ Hollandiæ Provinciæ. In aliis *fæderibus* Confoederatorum unus *prærogativam* habet præ altero. Ita *Prærogativam* habebant Romani in *fæderibus* cum Latinis, siquidem ipsi deliberabant & quid agendum esset statuebant: Duces quoque & præcipuos Officiales quoscunque con-

constituebant: denique penes ipsos erat ratio gerendi belli & fructus victoriarum, ita ut Latini non nisi Ministri essent Romanorum, aut, si quo modo eorum erant socii, id saltem locum haberet in belli molestiis atque periculis, gloriam autem, aut quæ bello parata erant, aut Imperium prorsus non participarent. Qua in re sanè Romani mirabilem ostenderunt iudicii vim, nam sub titulo fœderis atque societatis communibus viribus pro se solis atque pro se ipsis Imperium mundi acquisiverunt, ita ut Latini, cùm postmodum impatientius id ferre inciperent seque vindicare ideo vellent, universas Romanorum aliorumque, qui ipsis subiecti erant, populorum vires, Principes insuper Romanorum amicos atque Confoederatos contra se ipsos attraherent. *Fœdera* cum prærogativa etiam illa sunt, ubi confoederatus aliquis vel plus contribuere debet, vel plus de victoriæ fructibus sibi vendicat, quàm alter, his autem multum fidere nemo debet. Cui & hoc accedit, quòd, cùm utilitas Principum Confoederatorum non æqualis sit in ipsa expeditione bellica, credi vix possit, eosdem pari animo & æquali promptitudine acturos esse, sine qua tamen æqualitate socii nihil, quod alicujus sit momenti, efficient. Dabo hujus Exemplum, quod ipse oculis meis usurpavi. Viginti circiter anni effluerunt, cùm per aliquas Galliæ partes iter ego faciens,

ciens, cursumque continuandi curiositate impulsus Tuluni in navem conscenderem, atque Barcellonam, quæ in Catalonia est, exinde autem Alicantum & Malagam versus in Hispaniam veherer, eo prorsus tempore, quo Gallia cum Hispanis confociata Anglorum & Batavorum classem sibi inimicam & cum Imperatore pariter confociatam cum classe navali in hoc ipso mari inquireret, cum ea prælium commissura. Comparuerant in alto mari ambæ hæ terribiles classes, non admodum procul à plaga Africæ, quæ Tituana vocatur, uti ipsemet ego vidi; cumque altera alterius occursum evitare non posset, classis Hispano-Gallica numerosa admodum & centum navibus bellicis simul constans nona hora matutina, septimo circiter die mensis Septembris, classi Anglo-Hollandicæ, quæ numero non minor aut inferior erat, iusta serie propius accessit, quæ cum adactam se vidisset ad subeundam pugnam, aciem instruxit. Tum autem vidisses accensum subito prælium, explosis una vice ab una atque altera parte plus quam mille tormentis, ita ut Cælum obscuratum fuerit, mare perturbatum, terra etiam & vicina circum oppida omnia terræ aliquo motu concussa contremuerint. Durabat conflictus ab hora nona matutina usque ad occasum solis, eo quidem successu, ut neutri parti singularis victoriæ gloria adscribi potuerit,

tuerit; id tamen certum est, male admodum habitam fuisse classem Hispano-Gallicam, & ultra tria millia hominum perdidisse. Altero mane mox sub ortum solis iterum comparere atque instructa acie in lucem prodire inceperant duæ hæ classes, cum verò opportunum maxime esset, classem Hispano-Gallicam funditus delere, Hollandi, qui satis se jam præstitisse existimabant, & probe insimul intelligebant, utilitatem ipsis hinc sperandam non æquare jacturam, quam facere haud difficulter potuissent, non amplius ausi adoriri classem hostilem, separare se atque subducere paulum incipiebant; id quod videntes Angli, ne soli restarent, idem fecerunt, ob solam inæqualitatem utilitatis, quam à Confoederatis suis inde sperabant, id quod optimum erat in hac expeditione, negligentes. Idem fecerunt Angli ultimis his bellis in Flandria gestis, quippe qui ex particularis commodi aliqua ratione scopoque singulari primi partes Imperatoris deseruerunt, ut proinde Imperator Romanus, postquam primum ab Anglia, tum successive ab Hollandia, denique à Duce Sabaudia in Italia desertum se videret, adstrictus hac ratione fuerit ad cedenda Gallia loca quædam egregie munita tam in Flandria, quam prope Rhenum, pacisque tractationes cum ipsa instituendas. Econtrario vero eadem Anglia ante aliquot an-

nos cum Imperatore Romano contra Hispanos sese conjunxit & classe sua navali, cui Archithalassus Bingius præerat, Hispanorum classem in maribus Italiæ penitus dissipavit atque profligavit, partesque Imperatoris multo cum effectu tuita est, quoniam scilicet Imperatori non aliud propositum erat, quam ut in tranquilla terrarum Italicarum possessione, atque super throno Regnorum Siciliae & Napolis sese conservaret, neque Anglia aliud quid agebat, quam ut thronum Regni sui pacifice tueretur, & possessionem validissimi castelli Gibraltar tanto magis firmaret, ad compescendam eo melius Hispaniam tam à latere, quod ad mare vergit, quam versus Portum Mahon. Est verò hic portus, cujus ipse oculatus testis sum, ab ipsa natura forma canalibus constructus, qui ducentas naves bellicas facile capere potest, ita ut Anglia, dum portum hunc sibi vendicabit, satis valida futura sit ad transferendum bellum in Hispaniam, Galliam & Italiam, prout occasio id postulaverit.

Atque ita vero Imperator & Anglia in hac confœderatione pari passu ambulant, neque observari poterat prærogativa aliqua notabilis ab utili hujus vel illius partis in minimo saltem diversa. Breviter, sicut in Horologio una rota aut unum libramentum, si loco suo dimoveatur, totum nexum turbat, ita & in fœderibus unica saltem pars, quan-

quando ex particulari quodam scopo suo aut utilitatis ratione officio suo deest, totum *confederationis* corpus luxat, uti idem observatum fuisse Historiæ referunt in fœderibus sub Paulo III. & Pio V. inter Regem Catholicum & Venetos contra Turcas initis. Qui licet insigni ardore victoriaque insuper memorabili se movissent, nullos tamen fecerunt progressus ex unica hac ratione, quia non erat æqualis inter Confœderatos utilitatis ratio: parum enim curat Hispania, quæ in Oriente aguntur aut bello acquiruntur, licet ea multum ponderis habeant apud Venetos; his autem exiles videntur expeditiones in Africa, quæ tamen Hispaniæ oppido sunt necessariae. Unde est, quod Veneti, qui non nisi vires Turcarum in Oriente timent, & Hispani, quos Algerium, Marocco & Sales nimis vicina terrent, ob diversam utilitatis æstimationem æquali ardore simul se movere non possunt, Papa autem medius manet sumtus largiendo sine fructu. Itaque non nisi duo modi sunt ejusmodi contra Turcas confœderationem instituendi, quam aliquid spei de felici successu comitari possit. Alter quidem hic esse possit, ut omnes Principes Turcis cōfines uno eodemque tempore contra hostem hunc insurgerent, & quilibet pro se ipsum invaderet, neque id limitatis viribus, sed quantum fieri potest,

quandoquidem æqualis hic futura esset utilitatis ratio. Alter generosus magis foret, si plures Principes simul absque alio quam Divini honoris studio uno aut pluribus locis in ipsum irruerent, uti istis Heroicis temporibus accidit, cum multi Germaniæ, Flandriæ, Galliæ & Italiæ Principes, partim vendendo, partim oppignorando ditiones suas plus quam quadringenta millia hominum collegerunt, victisque ad Nicæam Turcis, Persis ad Antiochiam & Saracenis ad Hierosolymam universum Orientem concusserunt terramque sanctam universam recuperarunt. Ubi id maxime notari meretur, quod de tali ac tanta expeditione nec Rex nec Imperator ullus partes ceperint: & licet Galliæ atque Angliæ Reges nec non Imperatores Conradus & Fredericus illuc pariter se postmodum contulerint, non quidem ad expugnandum quicquam, sed ad conservanda belli præmia, nihil tamen, quod notari mereatur, effecerunt. Nostri est contrario temporibus ratio status atque utilitatis inter solos Principes Christianos regnare videtur, & inter ipsosmet hos maxime sanguinolenta fabricantur bella, quæ tamen abesse possent, neque admodum solliciti sunt de ratione status atque utilitatis, quam & habere & monstrare ipsos fas esset contra Turcas aliosque infideles. Machiavellus hac occasione con-

contra Christianos ita exclamat : Heu ! quare Principes Christiani adeo intendunt vires suas, ut unus alterum perdat, planè ac si nullos alios in mundo haberent inimicos. Nonne Turca ad portas stat & ad latera nobis est ? est vero hic talis inimicus, qui nihil unquam aliud quam oppressionem Christianorum cœtus cogitat, tantasque habet vires, ut ipsi resistere, non dicam ipsum superare, omnem, quæ inter Christianos armis comparari potest, gloriam longissime excedat. Quid ergo est, quod justiore aut honoratiore bellandi causam inter se ipsos quærunt Christiani, quam contra Turcam, neque ipsum curant, quin contemnere videntur ? Nonne ille Christianis tam munitas arces, tam validas urbes, tam vasta regna duoque insuper Imperia eripuit ? Nonne talis inimicus est, qui dominatur Africæ, imperat Asiæ, pluresque habet regiones, quam omnes Principum Christianorum status conficiunt, qui & medio dissidii atque discordiæ inter Christianos usus arrepta occasione opportuna optimas provincias genti Christianæ eripuit suamque potentiam atque vires talem in modum auxit, ut terra atque mari terribilem se reddiderit ? Quod si etiam per experientiam jam videmus quod præsentis Persiæ lites, quæ Regi Sophi cum usurpatore Miriweisio intercedunt, idem in com-

mo-

modum suum vertat, temporeque & occasione discordiarum harum intestinarum utatur, atque validum exercitum Turcicum illuc miserit, cujus ope optimam Regni hujus partem sibi subjicit atque subjugat, quid eum postea contra Principes Christianos pariter tentaturum esse existimamus, qui discordes præsentis tempore & divulsi à se invicem bella maxime sanguinolenta tam mari quam terra & per illa ruinam sibi invicem machinantur atque minantur, si quidem in mutua arma ruere inciperent: *Heu!* exclamat Machiavellus, *aperite oculos, O Principes Christiani, siquidem Turca eos maxime habet apertos, ut exitum vestrarum discordiarum observet, & tempore atque occasione utatur. Hem! ego nescio* (pergit supra dictus Politicus) *cur ratio status atque utilitatis plus deprehendatur inter vos, quam ut se exerat contra inimicum tam potentem, qualis est Turca. Heu! quam egregie, dicit idem, in hoc se demonstrat veritas dicti illius Salvatoris nostri, quod filii tenebrarum prudentiores sint in suis rebus, quam filii lucis. Sed revertimur ad propositum nostrum atque igitur concludimus, quod fœdera semper majorem potentiae gradum adjiciant, ubicunque lucrum inter partes est æquale, deficiente verò hac æqualitate pro certo tenendum, defuturum quoque auxilium à*
fœ-

foedere, & ideo tantum debent æstimari foedera, quantum habent stabilitatis: meliora sunt perpetua quam temporaria, foederibus enim, quæ ad tempus saltem panguntur, multum pariter fidendum non est, siquidem Principes plerumque non se movent nisi propter utilitatem atque amicum non magis quam inimicum agnoscunt, nisi ob commodum inde sperandum, aut malum metuendum, quo cessante subito & tempus cessat, uti supra quoque dictum fuit. Pari modo *offensiva & defensiva* simul meliora sunt, quam *offensiva & defensiva* solum. Nihilominus foedera *defensiva* contracta cum Civitatibus aut Principibus inimico vicinis aut potentiae ejus æmulis non levis momenti sunt, metus enim & suspicio, ne confœderati inter se invicem coeant, absterret inimicum, ut contra nullum ex iis nil quicquam tentare audeat. Quo modo & Helvetii securitati suæ prospexerunt: postquam enim perpetuum foedus *defensivum* inter se invicem inierunt, nemo est, qui vel minimum è vicis illorum invadere audeat. Defensio autem salutis suæ tam justa est, ut nulla alia probatione opus habeat, quam considerare arma animalium, cornua, dentes, ungues, calcitratus à natura ad conservationem eorum data. Et adhuc dum rosæ armatae sunt aculeis, grana spiculis & castaneæ spinis: natura denique in

in hoc tam sollicita est, ut Principes non opus habeant ab arte erudiri. Cavere tamen debent, ne terminos tali modo transilient, ut defensio in offensam abeat, siquidem conveniens satisfactio ipsis offeratur. Qua in re Romani egregie se gesserunt, nam inimicis, dummodo non fuissent indomiti, honestam pacem nunquam negabant, quæ & omnis belli finis esse debet, neque negari nisi iis, à quibus non aliter quam ipsorum cum exitio sperari potest, aut qui tale quid perpetrarunt, quod in Exemplum aliorum ipsorum cum interitu punitum esse debet. *Duabus his artibus* (inquit Sallustius de Romanis) *audacia in bello, ubi pax evenerat, aequitate, seque & Rempublicam curabant.* Tam justum est bellum *defensivum*, ut *offensivum* non aliam possit habere justitiam, nisi quam à *defensivo* accipit, neque *offensivum* laudabile esse potest & justum, nisi quantum defensionem sub se comprehendit, quandoquidem non dari potest casus, ubi licitum sit offendere per aliam rationem, nisi ad defensionem. Atque ideo non bene acturus esset ille, si Christiano more loquendum est, qui absque intentione & ratione se defendendi consilium capere vellet saltem offendendi, quia bellum offensivum nihil aliud pro objecto habet, quam spem boni incerti & futuri & turbas, atque in hoc quidem casu

casu focii non concursuri essent paribus viribus: *defensivum* autem plus habet efficaciam, quia in defensione periculum unius ob viciniam parem in reliquis ardorem facile excitat, atque id agit, ut commune, praesens & certum bonum concordibus animis defendatur & conservetur, paxque procuretur.

CAP. III.

DE

VIGILANTIA

EO TEMPORE,

CUM

VICINI PRINCIPES BELLIGERANT, ADHIBENDA.

Nihil magis est necessarium ad firmandam pacem & salutem status alicujus, quam probe se munire, quando vicini bellum inter se invicem gerunt. Quod si enim Princeps in his circumstantiis commeatu, munitionibus aliisque rebus ad expeditionem bellicam necessariis instructum se monstrare, viresque suas protectionem saltem expectantes ostendere neglexerit, id facile ei accidet, quod plerumque accidere solet, hoc est, ut subsequente inter eos, qui primum belligerabant, pace aut conventionem

tempeſtas belli in vicinos tandem erumpat. Facta pace inter Carolum II. Neapolitanum & Fridericum Arragoniæ Reges, viginti circiter naves bellicæ partim Cataloniæ partim Italiæ Sicilia & Appulia ſolvebant. Servierant primum dictæ naves ſupra nominatis Regibus, electo autem in Ducem Fratrem quodam Ruggero nauclero experientiſſimo, viam per mare Macedonicum & Græcum invenerunt, & damnum inauditum undiquaque intulerunt. Cum enim numerus hominum in dies creſceret, eo audaciæ proceſſerunt, ut Inſulas Archipelagi depopularentur, civitatem quoque terræ firmæ impugnarent & innumerorum hominum exitio ſe ditarent, id quod per duodecim annos durabat: ad extremum Athenienſium quoque Ducem trucidarunt huiusque ditiones ſibi vendicarunt. Compoſita eodem modo pace inter Philippum Mariam & Venetos, Capita quæ Principibus his ſervierant, certatim omnia contra ſtatum Eccleſiaſticum arma ſua converterunt: poſtea cum Veneti & Imperator Maximilianus arma depoſuiſſent, Hiſpani & Vaſcones, qui in bello iſto militaverant, cum Franciſco Maria ad ſtatum Urbini diverterunt, & Papam Leonem talem in modum afflixerunt atque oppreſſerunt, ut ad liberandum ſe ab oppreſſione infinitam pecuniæ ſummam impenderet, quam, utut partem
de

de Patrimonio Petri , Principes isti atque summa capita absque ullo scrupulo postea inter se dividerunt : & licet illam violentia extorsissent à Beatissimo Patre, licitum tamen existimabant, ut in commodum suum illam verterent, de excommunicationibus parum solliciti. Non possum non hic repetere verba Taciti, de moribus Germanorum, pag. 710. ubi de Cheruscis ita loquitur : *Nimiam ac marcentem diu pacem illacessiti nutriverunt, idque jucundius quam tutius fuit, quia inter impotentes ac validos falso quiescas, ubi manu agitur, probitas ac modestia nomina superioris sunt: ita qui olim boni aequique Cherusci, nunc inertes ac stulti vocantur. Cattis victoribus fortuna in sapientiam cessit.* Egregie intellexit hanc regulam regnans hodie Parmensis Dux Farnesius, cum enim Imperator Josephus Gloriosissimæ memoriæ cum defuncto Rege Ludovico XIV. bellum in Italia gereret, ille præter milites suos exercitumque ordinarium ultra decem millia militum instructorum conscribere jussit, ad tuendos melius terrarum suarum fines, locis etiam atque castellis per sat longum tempus quibuscunque necessariis rebus prospicere jussit, & licet nihil ipsi prorsus esset negotii neq; cum dicto Imperatore neque cum Gallia, consultius tamen ipsi videbatur, talem se præstare, qui magis timeri quam timere debeat.

Ad hujus igitur Exempli multorumque aliorum consimilium imitationem Princeps non solum pro defensione sua stare debet, quandoquidem in bellis *defensivis* male admodum suis rebus uti qui, potest (quod si enim hostis per fines intrare inceperit, destruit terram, consumit populos omnemque statum in confusionem atque perturbationem conjicit) sed & talem se monstrare quis debet, qui promptus sit ad tentandum & suscipiendum aliquid, ac proinde ad offendendum, ubi opus fuerit, ut scilicet timorem armorum quam longissime à parietibus suis removeat, quo ipso non modo terram suam in pace & securitate conservabit, sed & præter hoc censibus suis fructuque obedientiæ à populo præstandæ pacifice fruetur. Certe, quod ad scopum nostrum attinet, nemo dubitat, quin Marchio de Leede, Summus Hispaniæ Præfectus, postquam paucos ante annos maribus Siciliae se commisit, & expositis multis militum millibus Regnum hoc ex improvise plane mari ac terra infestavit, quin &, nemine hoc cogitante, idem expugnavit, & deturbato prius folio suo Serenissimo Sabaudia Duce brevi tempore sub obedientiam Regis sui redegit, viso victoriarum suarum successu postea certissime Imperatorem in Regno Neapolitano, Anglos autem in Gibraltar invasisset, nisi duæ hæ potentia bene sibi pro-

prospexissent, & ad prævertendam offensionem vimque vi repellendam promptæ fuissent atque paratæ, id quod & ipsa re præstiterunt. En! aliam egregiam similitudinem naturalem illam quidem & physicam. Sicut Princeps, qui vicinus est hominibus malo quodam infectis, nisi vias custodire jusserit, aut etiam mature de Antidotis & quæcunque sanitatem tueri possunt, sibi prospexerit, periculum incurrit, ne & ipse inficiatur, aut ne malum in terris suis ingentem edat stragem, quandoquidem in corpore debili & extenuato naturaliter plus potest morbus, quam ubi illud firmatum atque roboratum invenerit. Ita pariter pestis belli alicujus vicini, quæ generaliter loquendo nihil aliud pro scopo habet, quam utilitatem & lucrum ejus, qui suscipit, cæterorum verò perniciem, nisi aditus optime clausos atque munitosprehenderit, quam primum fortuna in puppi est, excedit terminos atque stragem & damnum facit ubicunque potest: quod si nonnunquam Vicinis, quorum infirmitatem cognoscit, damnum non inferat, saltem eos sibi subjicit, pecunias imperat, & potentia suæ tributarios reddit. Denique bestia est bellum, quæ nihil aliud agere novit, quam devorare, corrumpere, perdere: & sicut ignis nulla prorsus materia satiatur, nisi ingenti aquæ multitudine extinctus fuerit,

neque suppressi potest, nisi omnia, quæcunque ipsi vicina sunt, proculcentur: ita pariter bellum non satiatur, nisi pretiosa aqua ingentis nummorum multitudinis extinctum, aut cum ruina omnis hujus, quod utut debile ob stare sibi credit: atque igitur *tunc tua res agitur, paries cum proximus ardet.* Non desunt nonnunquam Principi cuidam, quando superiorem atque præpotentem se esse videt, prætextus ad minimum speciosi, quibus illicitum licitum, & quod injustum est, justum contra illos status apparet, quos subsidiis destitutos seque debiliores esse videt. Neque denique deficiunt unquam alii quidam Agesilai Lacedæmoniorum Reges, qui, uti in capite de Neutralitate innui, omne hoc debere se pro justo habere dicunt, quod propriæ patriæ utilitatem atque lucrum afferre potest, atque ita inserviendo occasioni atque tempori per rationem status atque utilis omnibus mediis omnique modo ac via imperium suum absque ulla alia consideratione ampliare satagunt. Unicum igitur remedium, ut quis de pace atque salute status alicujus publici certus esse possit, in hoc consistit, ut probe se præmuniat. Quin plus dicam, scilicet ad firmandam pacem atque salutem reipublicæ alicujus, non tantum, ut quis se præmuniat, opus est, quando vicini bella inter se gerunt, sed omni tempore, ut paratus

tus atque à viribus instructus aliquis sit, necesse est. Expectatio namque virium atque copiae, cum iis uti opportunum quam maxime esset, non semper prospere nobis succedet: belli quoque necessitates tot ac tantæ sunt, ut adhibita omni diligentia, qua uti possumus in rationibus earum in- undis iisque cumulandis semper aliquid de- futurum sit, cum tamen sapiens Politicus dicat, *non ita fidendum esse paci, ut arma prorsus deponantur, pax enim inermis debilis est.* Constantinus M. cum milites, qui limites patriæ tuebantur, dimisisset, minus quippe necessarios ob pacem universalem ipsi visos, gentibus barbaris portam aperuit. Probre regulam hanc, nostro licet damno, intellexit magnus Turca Constantino- politanus, ceu qui non modo tum, quando alii Reges & Principes bellum inter se reci- procant, sed & pacis tempore magis arma- tus est, quam Christiani tempore belli. Hoc consilio Principes quidam armamentaria instituunt, quo omne genus eorum, quæ in bello tam maritimo quam terrestri usui alicui esse possunt, recondunt, instrumentorum quoque militarium omne genus fabricari, aut quæ jam confecta sunt, poliri, attrita ve- ro refici continue curant. Inde fit, ut præ- sente occasione, quando omnia ad expedi- tionem bellicam necessaria in uno loco præ- sto sunt, paucis diebus non classem tantum

educere, sed & copiis terrestribus omnibus rebus necessariis providere possint, ad proseguendum iter, trajicienda flumina, eaque omnia efficienda, quæ bellatoribus accidere possunt, uti videri hoc potest in armamentario Venetorum nec non in altero quodam Ducis Saxoniae, quod Dresdæ est. Primum quidem omnia reliqua apparatu tam navali quam terrestri superat: posterius autem neque numero tormentorum & globorum, neque ulla alia re ad bellum terrestre necessaria ipsi cedit. Ad imitationem hujus, quod Venetiis est, Mahomet II. Turcarum Imperator Constantinopoli unum aliquod exstrui jussit, cujus auxilio ipse & successores sui classes Christianorum non curarunt, neque amplius curant. Qui vero opportunitatem fundandi aut ordinandi armamentaria non habet, id ad minimum agere debet, ut res sua publica aut urbs primaria omni materia omnibusque artis Magistris ad hunc effectum necessariis abundet, ut id, quod publico deest, pro re nata à particularibus suppleatur. Tales in Italia sunt urbes Mediolanum & Neapolis, ubi tanta est materiae quantitas, tanta artificum omnis generis multitudo, ut brevi tempore validus exercitus instrui possit. Locutus fui hætenus solum de provisione in genere & quasi in transitu, neque eousque discursum volui extendere, declarando & describendo
in

in particulari & ex professo provisiones munitionum, commeatus, pecuniæ, tormentorum, militum eorumque qualitatatum, fortalitorum eorumque situs; de hoc enim alia vice ex instituto & data opera loquar in tractatu meo secundo, ubi de aliis rebus consimilibus acturus sum, si quidem DEO per gratiam suam sanctissimam firma valetudine, meis autem Patronis hujusque opusculi amatoribus Favore suo mihi porro assistere placuerit.

CAP. IV.

QUOMODO HOSTEM PRÆVENIRE OPORTEAT.

Nobilissimus modus hostem procul ab ædibus nostris arcendi, nosque ab ipsius invasionibus tutos reddendi est ipsum prævenire, hoc autem multis modis fieri potest, uti successive dicam. Primo autem dico, posse hostem præveniri, si bellum in ipsius ædes transferatur; facile enim alterius res quietas esse patitur, qui suas in periculo videt. Callide observavit hoc medium in omnibus expeditionibus suis arduis Ludovicus XIV. defunctus Galliæ Rex, ceu qui primus semper fuit ad educendum in

castra exercitum suum, præcipue apud Rhenum, subjectoque sibi fortalitio Kehl & tota Rheni ab utroque latere plaga semper quæsivit, quomodo bellum in terram inimicorum suorum transferret, qua ratione Exercitum suum exactionibus atque alimentis vi ablatis vel extortis ex parte sustentavit, sumtibus scilicet alicnarum regionum, in quibus ita se munire validumque reddere allaborabat, ut difficile semper fuerit, ipsum expellere: quod sirarius id forte contigit, apud Rhenum tamen ne palmum quidem soli de suo perdidit, quin aliquid semper adjecit. Ita in omnibus reliquis expeditionibus in exterarum regiones susceptis tali usus methodo semper lucri aliquid reportavit progressusque fecit notabiles, uti Historia hodierna nobis refert. Eundem morem Romani servarunt in gravioribus quibuscunque ipsorum expeditionibus, excepto bello Gallico & secundo Punico, quæ tamen nunquam finiri poterant, donec arma sua ultra mare atque Alpes protenderent, & Hannibal consulente Antiocho, qua ratione bellum contra Romanos geri debeat, semper dixit, nihil fructuosi se effecturos, nisi Romanos in Italia invaderent. Idem Romani, cum de foedere inter Philippum Macedoniae Regem & Hannibalem inito audivissent, nihil melius aut consultius esse existimarunt, quam ut prævenirent Philippum

pum. Unde sane nescio, cur nostris temporibus quidam disputent, an melius sit Turcam in ædibus nostris expectare, aut in suis illum invisere? Antiqui certe nullum de hoc dubium moverunt, & ea semper summorum quorumvis belli præfectorum opinio fuit, melius esse invadere quam invadi; impetus enim qui non plane temerarius est, perturbat & confundit inimicum, partem ipsi adimit redituum & bonorum, commeatus sibi vendicat, aut ipsum adigit ad corrumpendos eos propria manu, eos quibus imperium ejus minus placet, ad se trahit, si vincit, multum lucratur, si perdit, pauca periclitatur, quam maxime quando bellum procul à domo sua geritur: denique casus bellici, qui infiniti sunt, citius favent invasori quam invaso. Hannibal & Scipio, (quos lumina artis militaris appellare jure possumus,) pudori sibi ducebant, ut unus contra Romanos extra Italiam & alter contra Carthaginienses extra Africam dimicaret, & Turca quoque bellum contra Christianos gessit, non sane domi eos expectando, sed ipsorum vel cogitationes, ne dicam consilia, præveniando. Quum igitur eos nunc hic nunc alibi invaderet, nec tempus concederet ipsum aggrediendi, ipsis Christianis per hoc infinitas terras eripuit. Tenendum autem hic est, quod invasio requirat vires, quæ numero vel fortitudine, vel opportunitate

maiores vel saltem æquales sint viribus illius, quem armis petimus, & qui tam alacrem & fortem se non sentit, alio modo præveniat. hostem necesse est, aditus scilicet & locos extantiores muniendo, ut hostis circa oppugnationem eorum vires vel tempus perdat, ac proinde opportunitatem det milites colligendi externasque copias in auxilium convocandi. Ita fecit Magnus Monarcha Carolus VI. noster hodie Imperator, qui cum Barcellonæ circumdatus atque à classe Hispanica arcte obsessus esset, secretum tamen semper commercium servavit cum incolis quibusdam montanis, Miquelets dictis, quibono numero se conjungentes exercitum Hispanicum interdum inquietarunt, invadendo scilicet Hispanos, si quando excursores emittebant, stragemque inter eos ediderunt, cum interim quindecim mille Angli in auxilium vocati prope Barcellonam è navi descenderent, & Hispanos tam fortiter propulsarent, ut tollere obsidionem eos adegerint, qua re accidit, ut Barcellona cum Majestate Cæsarea Carolo VI. in libertatem fuerit restituta. Idem hoc pariter prope Maltam accidit, ubi Turcæ oppugnationem Castelli à S. Hermo tentantes integrum mensem Majum impenderunt ac consumserunt, florem quoque militum perdiderunt, dum interim Christiani spatium habuerunt se uniendi & auxilia convocandi, ita ut Turcæ

cæ ipsi postea invasi fuerint atque expulsi. Cui autem vires defunt ad præveniendum & offendendum adversarium, id curet, quomodo potentem quendam inimicum adversus eum concitet, qui id efficiat, quod ipse non potest. Genfericus Vandalorum Rex, cum classis ejus in terribili quodam prælio navali à Basilio Patritio deleta esset, & ipse pejus quid adhuc timeret, Ostrogothis & Visgothis persuadebat, ut Imperium Romanum invaderent, atque ita ille securitati suæ consulebat. Quoties Ludovicus XIV. Galliæ Rex Turcam sollicitavit ad incipiendum bellum contra Imperatorem Romanum, ut scilicet hoc modo securitatem pacis in terris suis anticiparet? quoties etiam Imperatorem, dum in bello contra Turcam occupatus esset, ipse bello aggressus fuit? neque hoc certe alio faciebat fine, quam ex timore, & ad præveniendas Imperatoris vires, ne eas postea supra se ipsum effunderet. Est adhuc etiam alia quædam præveniendi species, quando nempe quis factionibus, quæ in terris inimici sunt, aut vicinis, aut collusionibus, aut consiliariis, aut præfectis, aliisque hominibus qui aliqua apud Principem autoritate sunt, in suum lucrum atque commodum uti novit, ut vel dissuadeant illi bellum contra nos, vel id aliorum vertant, & lenta executione inutile reddant, vel denique nos adjuvent, certiores nos facien-

ciendo, quid rerum agatur. Vulnere enim prævisa minus nocent. Quod si verò collusiones insuper tam frequentes fuerint, ut suspicionem seditionis, aut proditionis aut tumultus præbere possint, tanto melius hoc erit, ita enim noster plane erit securus, & inimicorum terra in turbas internas conji-
cietur. Elisabetha Regina Angliæ magna illa Politicà à Magno Papa Sixto V. tantopere æstimata optime observavit methodum hanc politicam adversus Regem Catholicum in Flandria, & Regem Christianissimum in Gallia. Cum enim Protestantes & Evangelicos Reformatos in his terris degentes consilio suo atque pecunia omnibus viribus sustentaret, hoc modo incendium belli procul à se arcuit: pari artificio atque Favore erga eos in Scotia usa, quibus minus satisfecerat Maria Regina, aut qui parum fa-
verent factioni Gallicæ, non solum securam se de hoc regno sed & dominam ejus reddidit. Alii quidam populi, ut aditum in terras suas hostibus vel difficilem redderent, vel præriperent, naturam in hoc imitati fuerunt, quæ Imperia non montibus solum, maribus & fluminibus, sed & immensis desertis divisit, uti Mauritaniam à China, Numidiam à Nubia, & Nubiam ab Ægypto, ita plane & illi fines suos vastarunt. Ita olim fecerunt Suevi, ita per multos annos quoque fecit Tammis Persarum Rex, qui ut
Ma-

Magnum Turcarum Imperatorem longissime à regionibus suis detineret, ingens terræ spatium in confinibus vastavit, consumsit atque in solitudinem commutavit. Idem prorsus facit Moscovita, quippe qui loca vicina inimicis suis non nisi deserta relinquit, ut si densæ silvæ ibi creverint (id quod per humiditatem soli facile contingit) eæ propugnaculi instar munitionibus suis esse possint, id quod magno suo labore atque ærumna expertus fuit Stephanus Poloniæ Rex. Ut enim hic ad loca inimici viam sibi pararet, sylvas ipsum cedere prius oportebat, quo labore satis multum temporis perdidit. Retinet hoc in continuo timore invasorem, dum ille, in quem impetus dirigitur, mala suâ atque infortunium interim potest prævidere. Antea vero, quam caput hoc finiam, audio aliquem mihi dicentem meque interrogantem, quid rei facere oporteret, si quis neque campum, neque locum, neque occasionem, neque tempus præveniendi inimicum cum omnibus supra dictis mediis atque viis haberet, sique inimicum nobis potentiores in occursum nobis venientem videremus, nec possemus ipsum effugere aut pugnam declinare? Dico igitur, in rebus desperatis animum atque audaciam sapius supplere vires exteriores atque defectum numeri, & si quis æqualis non sit hominibus, sufficit ut æqualis sit valore, uti jam innui,

ac proinde in tali casu pariter non opus est, ut impetum expectemus, sed aggressionem inimici anticipare fortiter oportet, aggressionem enim crescit militum animus, & invasio non tantum alacres reddit milites, sed & inimicum terret, confundit, in suspicionem insidiarum majorisque potentiae inducit, atque in perturbationem conjicit, perturbatio autem victi exercitus instar est victori. Quin velox atque subita praeventio plus valet quam potentia, illa enim hostem caedit atque perturbat, perturbatum verò facile frangit. Cæsar bellum civile cum trecentis equitibus & quinque mille peditibus incipiebat, praeveniebat incredibili velocitate inimicos, illis que non modo tempus copias colligendi eripuit, sed & jam collectas sustulit, & sexaginta dierum spatio totam Italiam occupavit. Possem allegare hanc in rem multa Exempla Serenissimi Ducis ac Principis Eugenii, qui contra inimicos suos numero ac viribus potentiores paucis militibus tam insignes ac memorabiles fecit progressus, ut perpetuo stupori futuri sint universæ posteritati. Nonne ille triginta quinque millibus militum universam Italiam dominio Cæsaris subiecit, postquam adeo exiguo numero validum Gallorum exercitum è centum mille hominibus constantem, qui eam jam occupaverat, destruxisset? nonne quadraginta milli-

bus

bus suorum militum numerosum Gallorum & septuaginta mille hominum exercitum, cujus maxima pars sub Taurino optime erat circumvallata ac munita, invasit atque vicit, destructoque illo penitus dictam civitatem, quæ ne in manus hostium incideret, singulis momentis periclitabatur, liberavit? nonne aliquoties miracula fecit, & Turcas duplo semper potentiores in Hungaria profligando insignes reportavit victorias? Quilibet scire hoc potest, uti & alia consimilia supra nominati Serenissimi Herois gesta bellica, cum Historiam modernam bellorum aliquot ab hinc annis gestorum legerit. Confirmatur insuper id quod supra dixi multis Exemplis ex antiqua Historia desumptis, sufficiat vero mihi solum illud Julii Cæsaris, qui cum Hellepontum triremi vectus trajiceret, & Cassium adversæ partis Ducem decem navibus occurrentem sibi haberet, non solum non fugit, (id quod in vanum fuisset) sed & audacter conspectum ejus subeundo eum talem in modum terruit, ut hic se illi dederit. *Audeamus* (dicebat L. Martius) *quod credi non potest, ausuros nos: eo ipso quod difficillimum videtur, facillimum erit: Scio audax videri consilium, sed in rebus asperis & arduis fortissima quaque consilia tutissima sunt.*

CAP.

CAP. V.

AN

CONSULTUM SIT,
UT
PRINCEPS IN PERSONA
IN BELLUM PROFI-
CISCATUR?

POSTquam demonstravimus, melius esse prævenire hostem, quam eundem domi exspectare, non erit præter scopum, si & hanc quæstionem tractaverimus, num expediat, ut Princeps in tali vel aliis expeditionibus in propria persona contra inimicum suum in bellum proficiscatur? Est hoc tale dubium, de quo partim Exemplis, partim rationibus, utrinque multa disputari possunt. Ab una enim parte facilius est, ut inter multos belli Præfectos & Barones, qui militiæ dediti sunt, unus vel plures sint excellenti judicio, valore, industria, felicitate, fortuna aliisque requisitis necessariis præditi, quam ut omnia ista semper deprehendantur in Principe; quò in casu melius est, ut ipse bellum gerat per alios, quam in propria persona; cum enim iste omnes istas virtutes non habeat, quæ in Præfecto requiruntur, præsentia ejus plus faciet ad turbanda bona consilia

lia impediendasque eorum executiones, quam ad promovenda illa hasque maturandas. Justinianus licet ne pedem quidem Constantinopoli moveret prudentia tantum atque fortitudine Virorum Excellentissimorum usus Italiam à Gothis & Africam à Vandalis liberavit, Persarum quoque insolentiam coërcuit, & ex virtute Belisaris, & Narsetti cæterorumque quos habuit Ministrorum felix fuit æstimatus. Quod si ex altera parte Princeps bellicoso est animo, omniaque ista, quæ supra innuimus requisita possidet, si in bellum proficiscatur, non tantum omnes istas virtutes, quas suorum aliquis Ministrorum habiturus esset, ipse secum afferet, sed & honoris atque autoritatis prærogativam, qua & vigilantiam Præfectorum & audaciam militum duplicabit, nam: *Urget præsentia Turni.* Cum autem Princeps istis virtutibus ornatus bene quidem optari, à nemine autem nisi à DEO formari queat, nihil nobis superest quam ut demonstremus, quænam expeditiones bellicæ præsentiam Principis absolute requirant, quænam non? supponamus igitur primum, Principem se non debere movere, nisi ob bella & negotia ardua: jam vero hæc suscipiuntur vel ad defensionem, vel ad offensionem aliorumque oppugnationem. Defensio vel principalem reipublicæ statum respicit, qui & Metropo-

lin complectitur, vel aliquam saltem partem & membrum à statu separatum atque dissitum attingit. Dicamus igitur, si hostem magna vi ad invadendos nos vel domi vel in ditione Principali accedentem viderimus, benè tunc actum esse, si Princeps ipsi præsens obviam eat, primum, quia præter splendorem, quem ipse expeditioni conciliabit, & comitatum Nobilium populique sponte & certatim ipsum secuturi animum quoque Exemplo suo addet subditis, & hoc ipso necessitatem iis imponet, pro defensione patriæ, Regnique atque Regis salute strenuè pugnandi. *Cum ventum in aciem* (inquit Tacitus de Germanis) *turpe Principi virtute vinci: turpe comitatui virtutem Principis non adquare. Jam vero infame in omnem vitam ac probrosum superstitem Principi suo ex acie recessisse, illum defendere, tueri, sua quoq; fortia facta gloriæ ejus assignare præcipuum sacramentum est, Principes pro victoria pugnant, Comites pro Principe.* Id quod plurimum habet ponderis in offensionibus, nedum in defensionibus. Præter hoc defensio & conservatio status tam insigne tamque universale est beneficium, ut cavendum sit Principi, ne cui alii, quam sibi ipsi acceptum id ferre debeat, alias namque periculum est, ne jacturam regionis suæ faciat, id quod Childerico Galliæ Regi accidit. Irruptionem in Nobilissimum hoc Regnum

gnum fecerat Abdimarus Hispaniæ Rex cum quadringentis quinquaginta millibus & quod excedit, Saracenorum, dumque Childericus delitiis Palatii sui implicitus non nisi festos dies sibi parare, & voluptatibus magis magisq; se immergere cogitabat, quicquid ipsi obvenerat, in amœnis viis Santonum & Pictonum ferro atque igne vastabat, non sine terrore incolarum atque desperatione. Neque verò dormiebat interim Carolus Martellus; collecto enim validissimo exercitu, in quo nervus erat & flos Nobilitatis populi Gallici, & vim hostibus audacissime obvertens in terribili quodam prælio ultra trecenta & septuaginta quinque millia trucidabat. Suscepta hæc tam fortiter defensio tantum efficiebat, animosque Gallorum in universum omnes adeo devinciebat Martello, ut Rex nullo amplius loco haberetur, neque mirari subeat Pipinum Filium suum tam tenui labore postea Regem fuisse proclamatum, Anno 752. Neque tamen, ut Princeps in præliis semper præsens adsit, necesse est: sufficiet interdum, si exercitui vel loco prælii vicinus sit, atque ita denique se gerat, ut salus reipublicæ vel in totum vel majori ex parte judicio suo, consilio, vigilantia, magnanimitati, fortitudini & industriæ debeatur. Idem observari debet in bellis offensivis atque gravibus sed vicinis: vicinia enim gratiam atque favorem

rem auget illi qui susceptum bellum ad finem perducit, & beneficium (uti plane est) majus apparet. Ita Leonenses & Castiliani nec non successive reliqui Hispaniæ Reges omnibus contra Mauros susceptis expeditionibus præsentis interfuerunt, inter quos nominari maxime merentur Ferdinandus Arragoniæ Rex & Isabella Castiliæ Regina conjux hujus, in obsidione atque expugnatione Granadæ. Quod si vero bellum procul domo atque regione geratur, caveat Princeps, ne à corde statuum suorum, unde in partes circumjacentes auctoritatem atque vigorem diffundere potest, procul abeat. Id quod diligentissime observavit Tiberius Cæsar. Cum enim Legiones Germaniæ aliquando non sine magno periculo tumultuarentur, & maxima pars existimaret, mutandam esse Principi sedem ad compescendos Personæ suæ Majestati seditiosos, nihilominus firmam hic cepit sententiam, ut nollet curare murmuraciones vulgi nec cujuscunque judicium, haud existimans convenire magno Principi, ut à sede Imperii, à primaria urbe eoque loco unde reipublicæ administrationem in reliquos derivat, præter necessitatem procul proficiscatur. Quam in rem scribit Herodotus non concessum fuisse Regi Persiæ, ut è regno foras exiret in bellum, nisi ad evitanda bella intestina, vicarium cum Insignibus & titulo Regis domi reliquif-

quisset. Cum David in periculo esset, ut occideretur; tunc juraverunt Viri David, dicentes: *nam non egredieris nobiscum ad bellum, ne extinguas lucernam Israël.* Semper ego veneratus fui omnia magni illius atque doctissimi Politici Machiavelli consilia, non autem admodum mihi placet hoc quod Principi suo dedit, scilicet ut sedem præsentiae suæ in regiones expugnatas transferat, nihil enim hoc est aliud, quam subditos naturales periculo exponere pro subjugatis, & substantiale pro accessorio. Neque valet Exemplum quod ille hanc in rem adducit, de Magno Turcarum Imperatore Mahomete primo, qui sedem suam Burgia Constantinopolin transtulit, neque enim Turca subditos habet naturales, & situs Constantinopolis commodissimus est, quam qui pro scopo suo, ut in medio subditorum suorum esset, invenire potuisset.

* * [○] * *

CAP. VI.
DE
CONDITIONIBUS
ET
REQUISITIS
PRÆFECTI AUT MINISTRI,
AD
SUSCIPIENDAS EXPEDITIONES
BELLICAS, NEC NON OBEUNDA STA-
TUS NEGOTIA à PRINCIPE
ELECTI ATQUE MISSI.

Quandoquidem igitur non expedit, ut Princeps ipse præsens semper ad omnes expeditiones bellicas proficiscatur, uti in præcedenti capite dictum fuit, poterit omnino expertum Ministrum, Ducem, atque caput, quod Imperet, eligere atque amandare. Tres autem in dimittendo illo conditiones observari debent: Primo, ut non nisi sit unus, secundo ut in demandatis sibi negotiis sit liber, tertio ut sit efficax. Unitas requiritur, quandoquidem negotium, quod à pluribus capitibus regitur, Amphisibænx instar est, quæ cum duo habeat capita, in quam partem se flectat, nemo scire potest, quæ & lente multaque cum molestia progreditur, unde Poëta eam
gra-

gravem vocat. *Et gravis in geminum urgens caput Amphisibana*, & quid vel tandem foret, si plura insuper quam duo haberet capita? Experientia quoque veritatem hanc manifeste docet. Arma enim Romanorum nunquam debiliora extiterunt, quam tempore Tribunorum militarium: Tum demum didicerunt: *Complurium Imperium bello inutile esse*. Atheniensium quoque res in oppugnatione Siciliae non nisi ob contrarias multorum capitum sententias pessum ivere. Optime hoc exercuit Rex Catholicus in oppugnatione Alzerbiae & Angliae. Spartani licet duos haberent Reges, in bellum tamen non nisi unum miserunt: neque tantum requiritur ut unus sit, sed etiam ut sit idem, hoc est, ut non facile fiat mutatio, sed ut unus negotium continuat, saepe enim mutare Ducem idem est ac plures uno habere, quam enim pluralitas capitum uno tempore imperantium affert confusionem, eandem crebra quoque mutatio in negotio aliquo affert, cursumque interrumpit, consilia suspendit, & executionem retardat. Inde est, quod Romani sub Regibus plura praestiterunt praecelara facta, pro ratione temporis quam sub Consulibus: isti enim continuabant expeditiones, his de anno in annum se mutantibus. Unde cum aliquoties observassent, tam crebris mutationibus *interrumpi tenorem rerum, in quibus pera-*

gendis continuatio efficacissima esset, inter traditionem Imperii novitatemque successoris, quæ nascendis priusquam agendis rebus imbuenda sit, sape bene gerenda rei occasionem intercidere, Scipionem in multos annos confirmarunt in expeditione Hispanica atque Africana, T. Flaminium in Macedonica, C. Marium in Cimbrica, & C. Cæsarem in Gallica. In tantum tamen Dux Bellicus & Minister in expeditione sua retineri atque confirmari debet, in quantum apparet ejusdem fidelitas, cum felicitate & fortuna, quæ nihil aliud quam DEI adjumentum est, conjuncta. Romani Lucillum proficisci patiebantur, quam diu arma feliciter tractabat, cum vero observarent, prosperitatem in medio cursu ipsum deserere, Pompejum in ipsius vicem amandarunt. Cum Carthaginenses sub propriis Ducibus victi fuissent, electione peregrini, qui Xantippus erat Lacedæmonius, fortunam quoque mutarunt. Pariter Siracusani, cum ipsi cum Ducibus suis nativis victi fuissent, cum Philippo Spartano victores extiterunt. Atque adeo culpari non debet Princeps, si missis subditis domesticis terræ suæ, quibus cum fortunam non habet, peregrinos in Ministros suos degat, ob imperium tam in milites quam in statum, ejusmodi enim mutatione conditionem suam atque commoda in meliorem statum convertere studet. Mutatio

tamen à Principe Regente aut successoribus suis non tam facile fiat, sed tantum ad promovendam status sui utilitatem, alias namque periculum est, ne removendo Ministrum dignum, senem expertum atque felicem prosperos ventos in contrarios mutet, facilis autem atque subita Ministrorum Senum atque expertorum mutatio violenti aliquid habet, atque violentia raro bene cedit, bonumque & durabilem effectum nunquam producit. Ita Plenius L. 88. 3. admonet, *Ministros à prioribus Principibus jam cum judicio dilectos fideque diuturna spectatos non temere à successore removendos. Quod tamen crebro usu venit* (uti subjungit doctissimus Boeclerus de Aula c. XXV. p. 753.) *obtrectatione & invidia eorum, qui veteribus istis velut custodibus remotis novis artibus suis faciliorem proventum sperant, aut praesidenter sibi arrogant plura, quam ii, quos aulicarum administrationum versabilis usus jam exercuit instruxitque;* quam diabolicam malitiam atque malignitatem Sceleratorum invidiaque plenorum hominum Princeps penitus abhorreere debet. Altera conditio Ministri, Præfecti aut Capitis cujusdam ea est, ne in negotio quod ipsi demandatur, arctis nimis conditionibus manus pedesque ipsi ligentur. Poterit Princeps omnem, quæ possibilis est, maturam considerationem in eligendo Ministro

adhibere; postquam autem semel eum elegit, convenit, ut amplissimam in exequendo officio suo auctoritatem ipsi concedat, alias impediet Ministrum resque suas atque utilitates ipse mutilabit, ut felici fato adscribendum sit, si bene res evenerint. Lycurgus prudentissimus Legislator licet auctoritatem Regum, quam diu domi essent, admodum restrinxerat, eandem tamen liberam absolutam atque independentem esse patiebatur in bello. Ipsi quoque Romani licet Senatum haberent refertum hominibus in omni militiae parte excellentissimis, suaque fortitudine per mille specimina probatis, nihilominus praefectum atque ministrum nunquam cum alio mandato ablegare soliti erant, quam ut curarent, ne quod respublica damnum caperet, in maximis etiam periculis summoque rerum discrimine Dictatorem creabant cum auctoritate domi atque foris plusquam regia. Tiberius mittebat Drusum Filium suum in Pannoniam, *nullis certis mandatis ex re consulturum*, neque hoc sine magna ratione, raro enim eo modo bellum geritur atque succedit, quem nos nobis formamus. Opus saepe est pugnare, non quia volumus, sed quia inimicus nos eo adigit, aut necessitas, qua premimur, nos constringit. Multas res, (uti Thucydides docet) bellum ex se ipso progignit; multas inimicus nos docet; multas etiam casus;

casus ; & (uti Q. Fabius Maximus inquit) *Consilia magis res dant hominibus, quam homines rebus.* Unde detestabatur iste temeritatem Varronis, qui antea quam hostem viderat, jam quid agendum sibi esset, animo præcipiebat : & tamen aliquot classes navales è maximis, quæ unquam mare ingressæ fuerunt, sequentibus temporibus comparuerunt, ita, ut nihil actum fuerit, & in fumum abierint omnia, cum Præfectus uti voluerit consiliis, quæ domo secum apportaverat, iis quæ occasio suppeditabat, plane contrariis, aliis consilia subveniunt occasione jam præterlapsa, &, uti Tacitus inquit, *ex distantibus terrarum spatiis consilia post res afferebantur.* Tertium requisitum Præfecti vel Ministri, qui ad negotia belli obeunda mittitur, est efficacia, quatuor vero conditiones ad hanc concurrunt: inclinatio, exercitium, sollicitudo & audacia. Inclinatio facit, ut expeditionem promptè & aliquo animi ardore suscipiat, hicque ardor ad finem usque duret. Differt motus naturalis à violento in hoc, quod naturalis in vehementia sua perseverat, quin & continue crescit, violentus vero è contrario non diu durat, sensim deficit, & in nihilum tandem abit. Jam vero motus alicujus, qui sponte, alacriter & cum voluptate opus aliquod aggreditur, naturalis quasi est; motus autem qui fit sine inclina-

clinatione, & tanquam agens violentum, deterior semper fiet magisque cessabit, atque difficile omnino est, ut Præfectus bellicus, qui contra suam inclinationem atque sententiam expeditionem suscipit, quicquam efficiat, quod alicujus sit momenti, uti Exemplum Niciæ in bello Siracusano docuit. Ferdinandus, multæ prudentiæ Rex, non solum curabat, ut ad ardua, quæ suscipiebat, negotia, sui Ministri inclinarent, sed totus etiam populus. Ita ut antea quam id quod animo conceperat factasque deliberationes ore pronuntiasset publice, multitudo eas jam dum desideraverit, tanquam sapientes & justas. Tum vero exercitium quoque negotium per viam planam ducit atque Regiam: quandoquidem homo, qui novitius est in negotio aliquo, non potest esse expeditus neque promptus. Adibit loca incognita, periculosa, perplexa, tramite egredietur, talia faciet, quæ postea tollere necessum habebit, idque accidit tam in expeditionibus bellicis quam Politicis & quæ statum attingunt, maxime autem in bellicis, dantur enim infiniti casus & accidentia singulis horis se offerentia, ad quorum improvisum occursum cum solido, firmo & constanti judicio atque animo stare impossibile est, nisi quis experientia confirmatus sit. Accedit postea diligentia, quæ omne illud, quod juvare potest negotium, colligit,

git, neque propriis solum commodis, sed & inimicorum negligentia uti novit. Media atque vires unit, atque ad operandum aptiora reddit & promptiora; nulla autem harum, quas supra indicavimus, rerum effectum alicujus momenti producet, nisi præsente animi vigore comitata sit. Quemadmodum enim non sufficit, ut navis rebus omnibus ad navigationem necessariis bene instructa sit atque munita, nisi ventus vela inflet ea-que propellat: ita neque inclinatio, neque exercitium, neque diligentia multum valet, nisi conatus animi determinati ea promoveat, & omnis deliberatio tam in Politica quam militari arte inutilis est, quæ non in ipsum effectum deducitur. Hinc de Arato Scionio legimus, quod, utut aliàs Magnus esset belli Dux, tamen, quia animus ipsi dederat, in præliis parum boni effecerit. E contrario verò tam antiquæ quam modernæ historiæ docent, optimas gravissimasque expeditiones plerumque à fortibus & præsentis animi Imperatoribus susceptas fuisse, quales fuerunt Alexander Pyrrhus, Cæsar, Hannibal, & nostris temporibus Serenissimus Princeps Eugenius, qui belli Dux dum omnes modos obsequium sibi conciliandi, uti sunt amabilitas, severitas, & existimatio, singulari suæ virtuti adjunxit, res perpetua memoria atque admiratione dignas gessit.

Omnes

Omnes supra dictæ conditiones, hoc est, efficacia, inclinatio, exercitium, sollicitudo & audacia virtuti ac prudentiæ annexæ pariter ut inveniantur necesse est in Ministris, Consiliariis, Plenipotentariis, Legatis, omnibusque illis, qui Principi cum in rebus Politicis atque status, serviunt, tum in Imperii administratione assistunt. Notum enim est, quod pariter Princeps non ubique præsens esse, aut circumambulare, neque etiam omnia solus facere potest, sed Viris opus habet idoneis atque aptis qui ad peregrinas aulas ablegentur, & de rebus ad Jurisdictionem pertinentibus, de statu, pace atque imperio cum aliis Principibus conferant, tractent eosque sollicitent. Quodque proinde in electione Ministrorum qui amandari debent, maxime necessarium sit, ut curet Princeps, tales ut habeat, qui negotiis pares iisque neque superiores sint neque inferiores, id quod observatum diligenter fuit à Tiberio. Qui enim majores, quam negotium requirit, vires suas esse sentiunt, levi brachio illud agunt, parum curant atque contemnunt, qui autem debiles sunt & negotio minores, sustinere illud non possunt. Opus igitur est, ut Princeps cum omni maturitate & magna pensitatione Ministros sibi eligat, qui ipsi non tantum in administratione Imperii fulcri instar sint, sed & eo mitti apti atque capaces, quo ut Princeps

ceps in propria persona proficiatur, consultum non est. Nam, *ad ornatum Principis* (dicit Cassiodorus 4. Ep. 3.) *credimus pertinere, aptas dignitatibus personas eligere, quia de claritate servientium crescit fama dominantium.* Ministri dicuntur, quia *eorum consilio & opera Princeps ad regendam summa fortuna sua molem utitur.* Et in his eligendis (dicit Doctissimus Boeclerus c. 6. p. 754.) *illud tanquam precipuum attendi debet, ut ex artibus prudentiam, ex moribus fidem habeant, qui majoribus rebus sunt admovendi.* Postquam deinde Princeps Ministros suos elegerit, bene erit, si eos honoret, & æstimet tanquam fortunæ atque utilitatis suæ coadjutores simul atque amicos, bonus enim consiliarius non minus valet quam integrum Regnum. *Etenim cum plurimis amicitiiis fortuna Principum indigeat, precipuum est Principis opus, amicos parare,* ita ait Plinius Panegy. 85. 6. Neque vero ideo Coadjutores & Ministri Principis alicujus ambitione atque vana gloria capi se patiantur, &, si ipsorum consilia, legationes atque negotia status ipsis commissa feliciter succedunt, gloriam atque splendorem exinde enatum soli attribuere debent Principi, ita quippe nos docet Lips. 3. Pol. 11. dicendo: *Ministrorum propria virtus & prudentia est, non Principis sed sua fortuna se metiri, neque*

que sibi gloriam rerum gestarum, sed Domino, a quo fatum acceperunt, cujusve auspicio auspiciatum habuere susceptum, tribuere. Quin &, moraliter loquendo, semper submissas debent gratias agere DEO, quod illos tam pulcris atque raris dotibus & qualitatibus ditaverit, in servitium, adjumentum & augmentum utilitatis Principum. More Christiano loqui possumus & dicere, Deum in usum decus, Regum & Regnorum certos homines peculiaribus dotibus imperii animique instruere, eorumque, quas sub auspicio imperioque Dominorum obeunt, actiones prosperare, & quodam modo per illos gloria Regum & saluti Regnorum consulere atque providere. Vid. Charact. Vellej. c. 2. & 3. Id quod omne exerceri fas est tam à Ministris bellicis & ad expeditiones militares missis, quam à Ministris status ad promovenda Principis commoda amandatis, quando felicem negotiorum suorum habuere successum.

*
* * *

CAP. VII.
QUANTUM PONDERIS
IN
REGIMINE
PRINCIPIS
SECUM
VEHAT RELIGIO.

*SUSTENTAT HÆC POLITICUM ATQUE
BONUM PUBLICUM,
ATQUE IDEO PRINCEPS EAM DEBET
DEFENDERE, SUSTENTARE, CON-
SERVARE ET PROPAGARE.*

Religionem fundamentum esse omnis Principatus, certissima res est. Cum enim omnis potestas à DEO veniat, neque gratia & Favor DEI aliter quam Religione comparari queat, omne aliud fundamentum erit ruinosum. Ex quo consequitur, quod religio & cultus divinus res maxime ardua sit, tam pro Ipso Principe, quam status sui Regimine. Adducit in hanc rem Doctissimus Joh. Ad. Osiander, in libro de Typo legis naturæ sequentes pulcherrimos versus ingeniosi alicujus Poëtæ, dicentis:

E

Lex

Lex sine Rege velut lumen sine sole fuisset,

Rex sine lege velut sol sine luce foret.

Quibus stagirita suum addit calculum 3.
 Polit. II. *Qui legem praeesse jubent, jubent praeesse Deum per suam vocem.* Qui leges aliis dare debet, legem ipse debet habere & cum lege vivere. Deus, qui non nisi bonum praecipit, optimus est. Idem Deus Regi praecipit, ut Exemplar sanctae suae legis secum habeat, eamque sollicitè observet, adhibitis verbis, quae, cum maximi sint momenti, heic loci apponere grave mihi non erit. Dicit igitur: *Postquam autem sederit in solio regni sui, describet sibi Deuteronomium legis hujus in volumine, accipiens Exemplum à Sacerdotibus Levitica tribus, & habebit secum legetque illud omnibus diebus vitae suae, ut discat timere Dominum Deum suum & custodire verba & caerimoniae ejus, quae in lege praecepta sunt, ne elevetur cor ejus in superbiam super fratres suos; neque declinet in partem dexteram vel sinistram, ut longo tempore regnet ipse & filius suus super Israël.* Diotimus tria Regi necessaria esse scribit, Religionem scilicet, Justitiam atque Militiam. Prima facit ad regimen tam suae conscientiae, quam populi atque subditorum suorum, secunda ad coercendos eos atque frenandos,

dos, tertia deniq; ad arcendos procul inimicos; & Aristoteles Tyranno quoq; Rēgi suadet, omnibus viribus eò adnitatur, ut pius atque religiosus esse credatur. Quod si enim subditi talem de eo opinionem habuerint, nunquam verituros esse, ne durius quid in se statuatur ab eo, quem Deos revereri existimant. Difficile autem omnino est, talem haberi aliquem, qui non vere est Religiosus, quandoquidem nihil est, quod minus duret, quam simulatio. Erit igitur Principis, ut ex toto corde suo Divinæ Majestati se submittat, ipsique Regnum suum & populi obsequium acceptum referat, quin quanto sublimiori in gradu supra alios collocatus est, tanto magis in conspectu DEI se deprimat: rebus atque negotiis tam Politicis quam militaribus manum non admoveat, nisi securus sit, esse ea conformia legi Divinæ, quæ Principi ad gubernandum se ipsum regendosque feliciter subditos gravissima atque maxime necessaria est. Officium Principis est gubernare, regula vero secundum quam gubernet, non sola est justitia, sed & simul religio, justitia enim tranquillum facit populum, Religio vero patientem insuper conservat privatum quemvis, licet ægre ipsi faciat justitiæ exercitium. Justitia jus servat, Religio vero illud sustentat, & ambæduæ Principem tuentur atque sustinent. Cum Marcus Aurelius compertum haberet, Rebellem

suum in Asia, Avidium Cassium trucidatum fuisse, valde hoc sibi displicere significavit, & caput ejus honorifice sepeliri jussit; cumque ipsi diceretur, Avidium, si vicisset, non tantam clementiam erga eum exerciturum fuisse, respondit: Avidius non poterat me vincere, non enim venerabatur sanctos DEOS. Certissimum est, Romanos, licet Christiani non fuissent, nullum unquam negotium remque publicam tractasse, nisi prius de ira Deorum placanda, favore illorum reconciliando, aut gratiarum actione pro acceptis beneficiis reddenda, invocandoque illorum auxilio atque Patrocinio deliberassent. Habebant Religionem suam pro principali aliquo regiminis capite, neque alterari eam nedum violari ullo modo patiebantur. Tantum robur habet in regimine religio, ut sine ea omne aliud status fundamentum vacillet, est enim ea omnium virtutum quasi mater, facit subditos obediens Principi suo, audaces atque animosos in periculis, liberales, ubi opus est, promotos in omni Reipublicæ necessitate, scientes quippe, quod, dum Principi serviunt, DEO servitium præstant, cujus vices ille gerit. Sapientissimum omnino atque pietissimum fuit Consilium Augusto Cæsari à Mæcenate datum: *Honora, inquit ille, Deum perpetuo & legibus conformiter, & fac ut alii idem faciant: Odio habe & castiga eos, qui*
in

*in rebus divinis novitates introducunt, idque non solum Deorum causa, (quos tamen qui contemnit, non aliud quid unquam curabit atque aestimabit) sed quia illi, qui aliquid in religione mutant, multos ad mutationem earum rerum impellunt, è quibus conjurationes, seditiones, conventicula & turba, bono Principatus regimini minus convenientes, nascuntur. Est certe valde impia atque stolidi opinio aliquorum, qui credunt atque dicunt, ad retinendos in obsequio subditos plus valere rationem humanam quam Divinam. Diabolica est hæc inventio quorundam, qui ruina sunt Regum, pestis Regnorum, scandala Christiani coetus, jurati religionis quam & DEI hostes, contra quem tamen ad Exemplum antiquorum Gigantum novam Babelis turrem fabricant, confusionem atque ruinam ipsis tandem parituram. *Qui habitat in Cælis, irridebit eos, & Dominus subsannabit eos.* Audite, O Principes, quid Jesajas de Consiliariis Pharaonis dicat: *Sapientes Consilarii Pharaonis dederunt consilium insipiens: deceperunt Egyptum angulum populorum ejus. Dominus miscuit in medio ejus spiritum vertiginis, & errare fecerunt Egyptum in omni opere suo, sicut erat ebrius, & vomens.* Facile monstrare possem, si locus hic esset, maximam partem damnorum, quæ status affligunt, ruinarumque Principum*

pum Christianorum, ab hac maledictione derivatam fuisse, per quam ipsi protectione atque Favore Divino se privarunt atque dearmarunt. Sufficiat vero monuisse, ut sapiant Exemplo Magistri sui Jeroboami, & finem quem ipse habuit, timeant, quotquot eundem imitantur, ut enim impietatem Jeroboami vindicaret Deus, contra Nadabum filium suum Regem Baassam excitavit, qui & illum cum tota stirpe sua trucidabat. *Non dimisit nec unam quidem animam de semine ejus, donec deleret eam.* Denique neque regnum stabile est, neque regimen Principis felix, nisi per Religionem, & dum Religio fovetur, populus simul obligatur, & in obedientia sua confirmatur, siquidem Christiana Religio Principi non solum corpora atque facultates subditorum suorum, sed & insuper animos atque conscientias subjicit, neque manus tantum ligat, sed & affectus atque cogitationes, vultque ut absolute Principi obedientia præstetur, ne pax turbetur. Neque quicquam est, quod subditos obedientia Principi debita solvat, nisi contra naturæ ipsiusque DEI legem sit. Vespasianus Imperator haud bonum esse dicebat, male tractare & contemnere religionem Christianam, quoniam multum faveat Principibus doceatque dare Cæsari omne id quod est Cæsaris. Debet igitur Princeps favere Religioni ob quietem status, ob bonum

num suum particulare & ob bonum publicum. Bonum publicum duplex est, spirituale & temporale. Spirituale est ipsa religio, cultus DEI & unio Ecclesiæ suæ, temporale est pax politica & civilis, quæ si à religione DEOque pacis non fundata sit atque gubernetur, subsistere seque conservare nequit. Non desunt hodie nostris temporibus maligni atque impii homines, qui dicunt, Principibusque & Magnatibus satis innuunt, quod injuriæ quæ Religioni fiunt, ad Politicam non pertineant, id quod falsissimum est, destructa enim religione vera quoque Politica pessum it, ut novæ sectæ atque religiones in statu quodam introducantur, aut ut innovationes in religione suscipiantur, quandoquidem hæ tanti sunt roboris, ut potestatem Principibus adimant, pacem civilem, temporalem ac spirituales turbent, populum seducant, venerationem denique tollant & veræ Religionis cultum destruant. Uti de Jeroboamo legimus qui, postquam adorationem Idolorum introduxerat, non amplius æstimabat populus cultum veri Dei, veramque religionem deserebat. Pariter Princeps duo habet genera inimicorum, temporales scilicet & spirituales, externos & internos. Potissima priorum intentio est, ut temporale Principum offendant, secundi vero pro scopo habent, ut offendant primum spirituale atque religionem, quo per-

actō ex consequenti etiam temporale perdunt, unde hi multo peiores sunt primis. Necessarium proinde est, ut quivis Princeps omnibus suis viribus procul removeat hanc pestem, seque his inimicis opponat: qui enim populum ab obedientia erga Ecclesiam, suaeque Religione data opera abstrahere atque seducere studet, Imperio atque obedientiae illi debitae eundem subducere longe facilius conabitur. *Omnium enim hominum* (ait B. Brentius) *nedum Magistratus, sive Principis interest, veram Religionem cognoscere, & pro virili sua juxta modum suae vocationis adjuvare & defendere*, atque iterum: *Impietas est, Religionem, quantum Magistratui Civili sive Principi licet, ab haeticis, Schismaticis & aliis adversariis non defendere*. Principes, qui persecutoribus religionis ipsorum sese non opponunt, suosque in Christo fratres opprimere patiuntur, neque se id sentire ostendunt, aut ad restituendos eos atque juvandos accurrunt, peccant contra primum sanioris Politicæ atque regiminis fundamentum, peccant graviter contra Deum, contemnunt Divinam ejus vocationem, seque nihil prorsus credere satis produnt. Nemo ire poterit inficias, quin Augustissimi atque religiosissimi, qui hodie regnant, Principes Protestantes, perpetuis gloriæ coronis, æternis laudibus, atque statuis illis;

glo-

gloriosissimisque inscriptionibus quæ M. Aurelio Imperatori erectæ quondam fuerunt, dignissimi sint, & in perpetuam pietatis suæ atquæ Zeli pro religione memoriam. Laudet igitur unusquisque Augustissimas Majestates Regum Angliæ atque Borussiæ, cum omnibus reliquis Celsissimis atque Serenissimis Rebuspublicis, statibus ac Magnatibus, dum hodienu[m] circa res Religionis suæ adeo vigilantes se præstant, animum illuc intendunt, partes suas non deserunt, nihilque reliqui adhuc faciunt, ut illa antiquo flori suo & in primitivum tranquillitatis statum Christianum restituantur, id quod agunt tam per sapientissimos suos Legatos, pacta prudentissima, foedera validissima, quam etiam denique per apparatus bellicos, si forte sancto Ipsorum Zelo, pio instituto, viisque ac mediis mitissimis non responderit desideratus multisque suspiriis expetitus pacis tam spiritualis quam temporalis effectus, qui vero dependet ab observatione legis & Religionis, suæque propria defensione, quæ contra inimicos atque persecutores suos omni ardore & Zelo exerceri atque suscipi debet, tam ex jure naturæ, quam ex præcepto DEI, qui, uti Deut. cap. 7. v. 22. legimus, Israëlitis præcepit, ut ad ulciscendam injuriam atque contumeliam religioni ipsorum factam arma contra Cananeos fumerent eos.

que perderent; *Præcepit DEUS filiis Israël, delere gentes multas terra Canaan.* Ex quo consequitur pro fine hujus capitis, quod Principes, si regimen suum feliciter velint administrare suumque Imperium ampliare, Religionem quoque pro viribus propagare debeant. Hoc vero duobus modis fieri potest: primo quidem, si Clementia sua atque misericordia dignos judicent, adjuvent, suoque Patrocinio non deserant eos, qui ad convertendum se eorumque religionem amplectendam è DEO moventur, aut eam fortiter jam amplexi fuerunt, neque hîc ullo modo personas respiciant, apud Deum enim non est acceptio personarum, ad eos vero quam maxime si attendant, qui post transactos in ipsorum terris multos jam annos, vitæ suæ Christianæ, bonorum morum, firmitatisque ac constantiæ in Religione bonum odorem sparserunt, denique luculenta dederunt specimina conversionem ipsorum ex spiritu Dei esse, & à sola inspiratione DEI provenisse. Ita enim populi peregrini, quorum ad aures talis Clementia atque misericordia Principis pervenit, amorem adversus eum suamque religionem concipiunt, dum opinio de pio Zelo atque estimatione Religionis quam habet, undiquaque spargitur, alliciuntur quoque Christiana hac ratione, qua vere conversos, qui luculenta
vitæ

vitæ suæ Christianæ specimina dederunt (mali enim uti infectum pecus ejici ex grege debent) recipit, sustentat, atque protegit, ut multi alii boni concurrant in unum cum iis coalituri, falsi autem foris maneant. Quod si vero Princeps è contrario vere atque ex animo conversos non adjuvet, eis non succurrat, suumque benignum Patrocinium conservet, bonam de se atque sua religione opinionem perdit apud populos tam domesticos quam peregrinos, ex hoc enim judicare possunt, Principem ne propriam quidem Religionem æstimare, neque magno ejus Zelo agi, hancque adeo non esse secundum dictamen Jesu Christi. Quod si etiam conversus aliquis ex desperatione, vel auxilii necessarii inopia ad deserendam fidem adactus fuerit, tale damnum atque infortunium æternam apud DEUM vindictam clamaturum esset contra eum, quicumque saltem permissive ejus causa fuerat, suosque successores atque dependentes. Secundus religionem propagandi modus est, si Princeps eos sibi eligat Ministros Ecclesiasticos, qui excellenti doctrina atque virtute sunt præditi, ut quam potest, bonam iis opinionem conciliet, si scilicet conciones ipsorum frequenter audiat, prudentia ipsorum, siquidem Viri sint, qui magna pollent experientia, utatur, divinis precibus intersit, opem er-
ga

ga pauperes ipsis commendet, denique materiam atque occasionem ipsis det, ut doctes suas ad commune bonum exercere possint. Et quoniam magna pars auxilii spiritualis populorum à Ministris Ecclesiasticis dependet, tot eorum habere curet, quantum satis est, neque iis auctoritatem atque existimationem addat, qui florida quadam & suavi, sed quæ infructuosa & vana est, loquendi ratione Auditoribus se insinuant, sed eos potius præferat, qui contempto hoc magnifico dicendi modo in concionibus suis non nisi spiritum & veritatem spirant, atque animis Auditorum quasi infundunt, vitia reprehendunt, peccata destestantur, animos amore Dei inflammant, neq; se ipsos aut ad suam gloriam prædicant, sed ad gloriam JESU CHRISTI, & Jesum Christum solum & hunc Crucifixum. Atque ita finem habet prima hæc pars, atque ultimum hoc caput, non autem, uti spero, opera mea, quam continuare animus mihi est, annexis, quæ jam collegi, aliis gravissimis argumentis, idque aspirante DEI auxilio atque Favore Patronorum meorum, qui opusculum meum approbabunt, protegent, atque sub umbram auspicii Ipsorum recipient.

FINIS.